

ዮሃንሳው ዬዳ ሳፃ ጌሉዋ

ዮሃንሳው ዬዳ ሳፃይ ፃፊቱዳዌ፣ አማኒያ አሳቱ ዬሱሲ ኪሪስቶስ ባሬንቱ ጎዳ ኡዲዳ፣ ጌሻቴላን ዴዔዳ ዲራው፣ ኡንቱንታ ሜቱኔ ዋዪ ጋኬዳ ዋዲያና። ፃፊያ ሁጹ ቆፋይ፣ ናባቢያዋንቱ ሂዶታይ ኩሜንሳ ጊዳናዳን፣ ኡንቱንታ ሜንሌላናሳኔ ባሬንታ ጋኬዳ ዬዴሳኔ ሜቱዋ ጊዶን ባሬንቱ አማኑዋን ሚናናዳን፣ ኡንቱንታ ሚኒሳናሳ።

ማፃፋ ጊዶን ዳሪያ ባጋይ ዳራኔ ካሊ ካሊዴ ቆንጨዳ ሳፃቱዋ ኦይቄዳዋ። ሳፃቱዋ ሄ ላይላን ዴዔዳ አማኒያ አሳሲ ጌሊያዋንታ። ሽን ሃራቱዋሲ ፀራ ጊዲዳ ቆንጨና ሃሳያን ሸቄዲና። ማዚሙሪያ አዘማቺ ዛሬሌቲያዋዳን፣ ሃ ማፃፋ ጊዶን ዴዔዳ ሁጹ ዬዋቱዋ ዲማ ዲማ ሳፃቱዋ ባጋና ዲማ ዲማ ማላኒኔ ዲማ ዲማ ሚሲሊያ ፓይዳቱዋን ዛሪ ዛሪዴ ሸቄዲና። ሃ ማፃፋ ፃሊያዋን ዲማ ዲማ ቆፋይ ዴፖፔኔ አው ጊዶ ቆፋይ ቆንጨ። ሄዌኔ፣ «ፆሳይ ጎዳ ጊዴዳ ኪሪስቶስ ባጋና ላዔሌና ሃኖታን፣ ባሬ ዋርኬቱዋ፣ ሴፃናናካ ኢቲፔ፣ ኢቲ ጌዴ ዉርሴላ ፆኑዋ ፆናና። ፖሌዳዋፔ ጉዪያን ባሬው አማኔቲዴ ዴዔዳ፣ ባሬ ባጋቱዋ ኦራላ ሳሉዋኔ ኦራላ ሳዓ አንጂዋ ላቲሳና» ያጊያዋ።

ሸምፓቱዋ ኡባቱዋሲ አሜቲዳ ቃንሳ ቆፋቱዋ

- ጌሉዋ (1:1-8)
- ሳፃ ደያኔ ላፑ ዋሳ ጎሌቶ ኪቲቲዳ ኪታ (1:9-3:22)
- ማፃፋኔ ላፑ ማታፋቱዋ (4:1-8:1)
- ላፑ ማልካታቱዋ (8:2-11:19)
- ዳዊያኔ ላዑ ሜሄቱዋ (12:1-13:18)
- ዲማ ዲማ ሳፃቱዋ (14:1-15:8)
- ፆሳ ሃንቁዋ ላፑ ፀዓቱዋ (16:1-21)
- ባቢሎኔ ባሻ፣ ዲዓ፣ ዋርዶ ናቢያኔ ሴፃናይ ፆኔቲያዋ (17:1-20:10)
- ዉርሴላ ፐርዳ (20:11-15)
- ኦራላ ሳሉዋ፣ ኦራላ ሳዓኔ ኦራላ ዬሩሳላም (21:1-22:5)
- ዉርሴላ ቁቲያ (22:6-21)

1 ኤሌሊ ሃናናው ቤሲያዋ ባሬ ኦሳንቻቱዋ ቤሳና ማላ፥
 ያሳይ ዩሱሲ ኪሪሰቶሳው ኢሜዳ ሳፃይ ሃዋ፤ ዩሱሲ ባሬ
 ኪታንቻ ኪቲዳ፥ ሃ ሳፃ ባሬ ኦሳንቻ ዮሃንሳ ኤሪሴዳ። 2 ዮሃንሲ
 ቤዒዳ ቱማቴላን ኦዳዳ ኡባብይ፥ ያሳ ቃላኔ ዩሱሲ ኪሪሰቶሳ
 ማርካቴላ። 3 ሃ ማፃፋ ናባቢያ ኡራይ * እንጃቴዳዋ፤ ቃሲ ሃ
 ቲሞቢቲያ ማፃፋ ሲሲያዋንቱኔ ሃ ማፃፋን ፃፌቴዳዋ ናጊያዋንቱ
 እንጃቴዳዋንታ፤ አዪሲ ሳፐ፥ ሃ ዩዉ ፖሊታናው ዋዲ ማታቴዳ።

ኢሲያን ዳዒያ ላፑ ዋሳ ጎሌቱዋሲ ኪቲቴዳ ሳርታ

4 ታኒ ዮሃንሲ፥ ኢሲያ ጋዲያን ተ ዳዒያ ላፑ ዋሳ ጎሌቶ ያጋይ፤
 ካሴ ዳዒያ ያሳፐ፥

ሃዒካ ዳዒያ ያሳፐ፥

ሲንላፐካ ያና ያሳፐ፥

ቃሲ አ ካዉቴላ ኦይዲያ ሲንላን

ዳዒያ ላፑ አያናቱዋፐ፥

አጾ ከካቴላይኔ ሳርቴላይ

ሂንቴንቱሲ ጊድ።

5 ቃሲ አማኔቴዳ ማርካ፥

ሃይቁዋፐ ኮይሮ ዳንዳዳ

ናዓፐ፥

ሳዓ ካታቱዋ ሞዲያ

ዩሱሲ ኪሪሰቶሳፐ

አጾ ከካቴላይኔ ሳርቴላይ

ሂንቴንቱሲ ጊድ።

ኢ ኦና ሲቁኔ

ቃሲ ኦ ናጋራ አይሌቴላፐካ

ባሬ ሱላን

ኦና ከሴዳ።

6 ኦኒ ባሬ ያሳዉኔ አዋ

ኦላና ማላ፥

ኢ ኦና ካታቱዋኔ

ቁሳቱዋ ኦሴዳ፤

አው ማጺናፐ ማጺና ጋካናው

* 1:3 ናባቢያ ኡራይ፥ ሃዋ ጉሳይ ኡባ አሳይ አቲፐ ያሳ ጎሹቲያ ዋዴን ሄዋንቱሲ
 ቃላ ናባቢያ ኡራይ እንጃቴዳዋ ጉሳ። † 1:4 ኢሲያ ጋዲያ፥ 1:4-3:22 ዳዒያዊ
 ዳቢዳቢያ ጊዲዳ ፃፌቴዳ። ኢሲያ ጋዲ አዋዪፊ ዶሊያ ባጋና ዳዒያ ሮሜ ካዉቴላ
 ጊዲዳ ሃዒ ሃ ዋዲያን ቱሪኬ ጋዲያ ጊዳ ጸሴቲያዋ። 1:4 ከሰ 3:14፤ ሳፅ
 4:5 1:5 አሳ 55:4፤ ማዝ 89:27

ቦንቹኔ

ሞዲያ ወልቃይ ጊደ። አሜንዲ።

7 ቤዲቲ።

ዩሱሲ ሻርያኒ ዩ።

አሳይ ኡባይ፣ ሃራይ አቶ።

አ ጫዴዳዋንቱካ

አ ቤዳና፤

ሳዓን ዴዲያ አሳይ ኡባይ

አ ጋሱዋን ዩካናዋንታ።

ሃዌ ቱሙፔ ሃናናዋ። አሜንዲ።

8 ካሴ ዴዲያዌ፣ ሃዲካ ዴዲያዌ፣ ሲንፋፔካ ያና ጎዳይ፣ ኡባፔ ወልቃማ ያሳይ፣ «ኡባባው አልፋይኔ ኦሜጋይ፣ ኮይሩኔ ወርሴላይ ታና» † ያጌ።

ኪሪሰቶሲ ሳፃን ቆንጩዳዋ

9 ታኒ ዮሃኒሲ፣ ሂንቴንቱ እሻይ፣ ሂንቴናና ዩሱሲ ኪሪሰቶሳ ዋዪያኔ አ ካወቲፋ ቃሲ አ ዳንዲያ እቲፔ ሻኬቲያዌ፣ ያሳ ቃላ ኦዴዳ ዲራወኔ ዩሱሳዋ ማርካቴዳ ዲራው፣ ፒዳሞ ጊያ ሃላይ ደደ ቢታን ዴዲዲ። 10 ጎዳ ጋላሳን ታኒ አያናን ዴዲይ፤ ታኒ ታፔ ጉዩና ማላካታ ዋሱዋ ማላ ወልቃማ ኮሻ ሲሳዲ። 11 ሄ ኮሻይ ታና፣ «ኔኒ ቤዲያዋ ማፃፋን ፃፋ፤ ኢሲያን ዴዲያ ላፑ ዋሳ ጎሌቶ፣ ኤፌሶና፣ ሳሚሪኔሳ፣ ጴርጋሞና፣ ቲያዲሮና፣ ሳርዴሳ፣ ፒላዴሊፊያ፣ ሎዶቂያ ዋሳ ጎሌቶ ዩዳ» ያጌዳ።

12 ታኒ ታው ኦዲያ ኮሻ ቤዳናው ጉዩ ሲማዲ፤ ያምፒያ ዋሊያ ላፑ ዋርቃ ባላቱዋ ቤዳዲ። 13 ሄ ባላቱዋ ጊደን አሳ ናዓ ማላቲያዋ ቤዳዲ፤ አዲሳ አፊላ ባሬ ጌዲያ ጋሊ ማዪዴ፣ ዋርቃ ዳንጩዋ ባሬ ቲራን ዩሺ አሌዳ። 14 አ ሁጲኔ አ ሁጲያ ቢናናይ ቦላ ዶርሳ ኢሲኪያኔ ሄዋፔካ አጲዴ ሻቻ ማላቲ፤ አ አይፊካ ታማ ላጩዋ ማላቲ። 15 አ ጌዲካ ጮጪያ ታማን ቲሪዴ ጰሊያ ናሃሲያ ጊያ ቢራታ ማላቲ፤ አ ኮሻይካ ወልቃማ ሻፋ ጉንላ ማላ።

1:6 ኬስ 19:6፤ ሳፅ 5:10 1:7 ዳን 7:13፤ ማት 24:30፤ ማር 13:26፤ ሉቅ 21:27፤ 1፡፳፭ 4:17፤ ዛክ 12:10፤ ዮሀ 19:34፤ 37 † 1:8 አልፋይኔ ኦሜጋይ፣ ሃዋ ጉሳይ ኦራላ ጫቁ ኮይሮ ግሪኬ ቃላን ፃፊቲዳ ዲራው፣ ኮይሩኔ ወርሴላይ ጋናው ኮዪዴ፣ አልፋ ጊያ ግሪኬ ኮይሮ ፒዶሊያ አኪዴ ወርሴላው ቃይ ኦሜጋ ጊያ ወርሴላን ዴዲያ ፒዶሊያ አኪዲና፣ ሃዋንታ ጉሳይ ለሚሱዋን ዳወርሱዋ ፒዶላቱዋ አኪንቶ [አ፣ ዝ] ያጌያዋ ማላ ጉሳ። 1:8 ሳፅ 22:13፤ ኬስ 3:14 1:13 ዳን 7:13፤ 10:5 1:14 ዳን 7:9፤ 10:6

16 ኢ ባሬ ኡሼቻ ኩሺያን ላፑ ያለንታቱዋ ኦይቄዳ። ኦ ደናፔ ላዑ ባገና ቃሬቲዳ ማሻይ ኬሴዳ። ኦ ዴሙካ ሎይሌ ፖሲያ ኦዋይፊያ ማላቲ።

17 ታኒ ኦ ቤዔዳ ዋዴ ሃይቄዳዋዳን ሃናዴ፣ ኦ ጌዲያ ማታን ኩንዳዲ። ባሬ ኡሼቻ ኩሺያ ታ ቦላ ዋሊዴ፣ ታና ሃዋዳን ያጌዳ፤ «ያዮፓ፤ ኮይሩካ ዉርሴላይካ ታና። 18 ታኒ ዴዑዋን ዴዲያዋ። ታኒ ሃይቃዲ፤ ሺን ቤዓ፣ ሜጲ ሜጲናዉካ ዴዑዋን ዴዳይ። ሃይቄዋ ቁልፒኔ ሲያሊያ ቁልፒ ታ ኩሺያን ዴዔ። 19 ሲሚ ኔኒ ቤዔዳባኔ ሃሲ ዴዲያዋ፣ ቃሲ ሲንላፔ ሃናናባ ፃፋ። 20 ኔኒ ታ ኡሼቻ ኩሺያን ቤዔዳ ላፑ ያለንታቱዋ ቢሌላይኔ ቃሲ ያምፓቱዋ ዋሊያ ላፑ ዋርቃ ባላቱዋ ቢሌላይ ሃዋ፤ ላፑ ያለንታቱ ላፑ ዋሳ ጎሌቱዋ ኪታንቻቱዋ፤ § ዋሳ ጎሊያ ላፑ ዋርቃ ባላቱ ላፑ ዋሳ ጎሊያ።

2

(1) ዩሱሲ ኤፌሶንን ዴዲያ ዋሳ ጎሌው ጎዋ

1 «ኤፌሶንን ዴዲያ ዋሳ ጎሌ ኪታንቻው ሃዋዳን ያገዴ ፃፋ፡

«ባሬ ኡሼቻ ኩሺያን ላፑ ያለንቲያ ኦይቄዳዋ፣ ያምፓቱዋ ዋሊያ ላፑ ዋርቃ ባላቱዋ ጊዲዋና ሃሜቲያዋ ሃዋዳን ያጌ። 2 ታኒ ኔ ኪታ፣ ኔ ዳቡራኔ ኔ ጌንጨዋ ኤራይ። ቃሲ ኔኒ ኢታ ኦሳቱዋ ጌንጫናው ዳንዳያቤናዋካ ታኒ ኤራይ፤ ዩሱሲ ኪቲዳዋንታ ጌዴናን ዴዲያ ባሬንታ፣ «ኩኒ ዩሱሲ ኪቲዳዋንታ» ጌያዋንታ ኔኒ ያሞሳዴ፣ ኡንቱንቱ ዋርዶ ጌዲያዋ ዴሜዳዋካ ኤራይ። 3 ኔኒ ጌንጫዳ፤ ቃሲ ታ ሱንላ ዲራዉካ ሜቱዋ ዳንዳያዳ፤ ዳቡራቤይካ። 4 ሺን ታኒ ኔና ካጲያባይ ዴዔ፤ ኦዲሲ ጎፔ፣ ኔኒ ካሴ ኔ ሲቁዋ ኦጋዳ። 5 ሲሚ ኔኒ ሃቃፔ ኩንዳዲንቶኔ ኦኪካ። ኔ ናጋራፔ ሲማ፤ ኔኒ ካሴ ኦሊያ ኦሱዋ ኦላ። ሂዌ ጳዮፔ፣ ታኒ ኔገ ያና፤ ያዴ ኔኒ ኔ ናጋራፔ ሲማና ጳዮፔ፣ ኔኒ ያምፒያ ዋሊያ ኔ ባላ ኦ ሳዓፔ ኦካዲጋና። 6 ሺን ኢቲባ ሎይላዳ፤ ኒቆላዋቱዋ ኦሱዋ፣ ታኒ ኢዲያዋ ኔኒካ ኢፃዳ።

1:15 ሃክ 1:24፤ 43:2 1:17 ኢሳ 44:6፤ 48:12፤ ሳፅ 2:8፤ 22:13 § 1:20 ኪታንቻቱዋ፡ ሃዋንታ ጉሳይ ኦማኒያዋንታ ካሌሊያ ጨማቱዋ ዋይ ኦማኒያዋንቶ ኪቲቲዳዋንታ።

7 ሲሰናድህ ሃይላይ ደዲያ ኡራይ ጌሻ አያናይ ዋሳ ጎሌቶ ጊያዋ ሲሶ፤ ታኒ ያኒያ ኡራው ያሳ ጌኔቲያን ሞኪያ ደዑዋ ሚላ አይፊያ ማናው አማና ያጌ» ያጋዴ ፃፋ።

(2) ዩሱሲ ሳሚሪኔሳን ደዲያ ዋሳ ጎሌው ጎዋ

8 «ሳሚሪኔሳን ደዲያ ዋሳ ጎሌ ከታንቻው ሃዋዳን ያጋዴ ፃፋ።

ሃይቁዳዌ፣ ሃይቁዋፔካ ዳንዳዳዌ፣ ኮይሩኔ ወርሴላይ ሃዋዳን ያጌ።

9 ታኒ ኔ ዋዪያኔ ኔ ሂዬሳቴላ ኤራይ፤ ሺን ኔኒ ዱሬ። አዪሁዳ ጊዳናን ደዲያ ባሪንታ፣ ሉኒ አዪሁዳ ጊያዋንቱ ቦሪያዋ ታኒ ኤራይ፤ ሺን አንቱንቱ ሴፃና ማባራን ደዲኖ።

10 ኔኒ ዋዪታና ዋዪው ያዮፓ። ቤዓ፣ ፃላሂያ ካፑ ሂንቲፔ አማራዳዋንታ ያዋሳናው ቃሾ ጎሌን ዬጋና፤ ታሙ ጋላሳ ጋካናው ሂንቲንቱ ዋዪታና። ሃይቃና ጋካናሲካ አማኔቴዳዋ ጊዳ፤ ታኒ ኔው ደዑዋ አኪሊሊያ * አማና።

11 ሃይላይ ደዲያ ኡራይ ጌሻ አያናይ ዋሳ ጎሌቶ ጊያዋ ሲሶ፤ ያኒያ ኡራይ ላዔሉዋ ሃይቁዋን ተ ቆሄቴና ያጌ» ያጋዴ ፃፋ።

(3) ዩሱሲ ጴርጋሞናን ደዲያ ዋሳ ጎሌው ጎዋ

12 «ጴርጋሞናን ደዲያ ዋሳ ጎሌ ከታንቻው ሃዋዳን ያጋዴ ፃፋ።

ላዑ ባጋና ሌፊቴዳ ማሻይ ደዲያዌ ሃዋዳን ያጌ።

13 ታኒ ኔኒ ደዲያ ሳዓ ኤራይ። ኔኒ ሴፃና ካወቴላ ኦይዲ ደዲያ ሳዓን ተ ደዓሳ፤ ታ ሱንላ ሚኒሳ ናጋሳ። ሃራይ አቶ፣ ሴፃናይ ደዲያ ሳዓን ሂንቲንቱ ማታን አሳይ ዋጴዳ ታኒ አማኒያ ማርካይ አንቲጳሲ ደዲያ ዋዳካ ታና አማኒያዋ አጋቤይካ።

14 ሺን ታኒ ኔና ቦሪያ ጉላባይ ደዴ፤ ኢሰራዔሊያ አሳይ ኤቃው ያርሼዳ ቁማ ማናዳኒኔ ዋሹማናዳን ኡንቱንታ ናጋራ ኦሲሴዳ

2:7 ደዋ 2:9፤ ሳፅ 22:2፤ ሂዝ 28:13፤ 31:8 2:8 ኢሳ 44:6፤ 48:12፤ ሳፅ 1:17፤ 22:13 * 2:10 ደዑዋ አኪሊሊያ፣ ቦንቲቴዳ ደዑዋ። † 2:11 ላዔሉዋ ሃይቁዋ፣ ኮይር ሃይቁ አሹ ሸምጥጥፔ ሻኬቲያዋ ጊዳዳ፣ ላዔላ ሃይቁ ሸምጥ ሚጲናው ሚቶቲዴ ደዲያ ሃይቁዋ። ‡ 2:13 ሴፃና ካወቴላ ኦይዲ፣ ሃዋ ቢሌላይ ሉይሊዴ ቆንጩ ጊዳና፣ ሺን ሃዌ ቤሲያዌ ያሳ ኤሪናን አጸዳዋንቱ ጎዪያ ጎይና ሳዓ ጋና ዳንዳዬ።

ባላቃ ታማሪሴዳ ባላማ ተሚርቲያ ታማሪያ አማራዳ አሳቱ ኔናና ደዒኖ። 15 ሄዋዳንካ፣ ቃሲ ኒቆላዋቱዋ ተሚርቲያ ታማሪያ አሳቱ ኔናና ደዒኖ። 16 ሄዋ ዲራው፣ ኔኒ ኔ ናጋራፔ ሲማ፤ ሄዋ ቆዮፔ፣ ታኒ ኔኮ ኤሌካ ያና፤ ያዴ ሄ አሳቱዋና ታ ደናፔ ኬሲያ ማሻን ኦሌታና።

17 ላይላይ ደዒያ ኡራይ ጌሻ አያናይ ዋሳ ጎሌቶ ጊያዋ ሲሶ። ያኒያ ኡራው ታኒ ጌማን ደዒያ ማናፔ አማራዳዋ አማና። ቃሲ ታኒ ቦላ ሹቻካ አው አማና፤ አኪያ ኡራፔ አቲን፣ ኦኒኔ ኤሪና ኦራላ ሰጎላይ ሄ ሹቻ ቦላ ፃፊቲ ኡቴዳ) ያጌ» ያጋዴ ፃፋ።

(4) ዩሱሲ ቲያዲሮኔን ደዒያ ዋሳ ጎሌው ጎዋ

18 «ቲያዲሮኔን ደዒያ ዋሳ ጎሊያ ከታንቻው ሃዋዳን ያጋዴ ፃፋ፡

«የሳ ናዒይ፣ ታማ ላጩዋ ማላቲያ አይፊ ደዒያዌ፣ ቃሲ ጮጪያ ታማን ጌሪዴ ጸሊያ ናሃሲያ ጌቴቲያ ቢራታ ማላቲያ ጌዲ ደዒያዌ፣ ሃዋዳን ያጌ።

19 «ታኒ ኔ ኦሱዋ፣ ኔ ሲቁዋ፣ ኔ አማኑዋ፣ ኔ ማዲዋኔ ኔ ጌንጩዋ ኡራይ፤ ኔኒ ኮይሮ አሊያዋፔ ሃዒ ዳሪሳዴ አሊያዋ ታኒ ኡራይ። 20 ሺን ታኒ ኔና ካዲያባይ ደዒ፤ ባሬና፣ «ታኒ ናባቶ» ያጊያ ሚሺራቶ ኤልዛቤሎ ሹኔኮ ጋዳ፤ ሄ ሚሺራታ ታ ኦሳንቻቱ ዋሹማናዳኒኔ ኤቃው ያርሼዳ ቁማ ማናዳን፣ ታማሪሳዉኔ ባሌላው። 21 ኢዛ ባሬ ናጋራፔ ሲማና ማላ፣ ታኒ ኢዚው ዋዲያ አማዲ፤ ሺን ዋሹማናው ካጄሊያዋፔ ኢዛ ሲማናው ኮያቤይኩ። 22 ቤዒቱ፣ ታኒ ኢዛ ጊሱዋን ኩንዲሲና፤ ሳኩዋን ኢዛ ዋዬታና። ኢዚና ዋሹሚያዋንቱ ሄ ኢዚና አሊያ ናጋራፔ ሲማና ቆዮፔ፣ ኡንቱንታካ ዋልቃማ ዋዬያን ዬጋና። 23 ታኒ ኢዚ ናናካ ዋዳና፤ ቃሲ ዋሳ ጎሊያ ኡባይካ ታኒ አሳ ቆፋኔ አውዋ ኤሪያዋ ጊዲያዋ ኡራና፤ ታኒ ሂንቴንቴሲ ሂንቴንቴ ከታ ማላ አማና።

24 «ቲያዲሮኔን ደዒያ ሃራቶ፣ ሃ ኢታ ተሚርቲያ ታማሪቤናዋንቶ፣ ሃራቱ፣ «ሴፃና ጨዋ ዬዉዋ» ጊያዋ ሂንቴንቴ

2:14 ፓይ 25:5፣ 7፤ 31:16፤ ዛር 23:4፤ ፓይ 25:1-3 **2:17** ኬስ 16:14-15፤ 16:33-34፤ ዮሀ 6:48-50፤ ኢሳ 62:2፤ 65:15 **2:20** 1ካት 16:31፤ 2ካት 9:22፣ 30 **2:23** ማዝ 7:9፤ ኤርዋ 17:10፤ ማዝ 62:12

ታማሪቤዪኪታ፤ ታኒ ሂንቲንታ ሃራ ዴፀዋ ቶሲኬ ጋይ። 25 ሺን ታኒ ያና ጋካናው ሂንቲንቲሲ ዴዲያዋ ሎይሊ ናጊቲ።

26-27 ለጎዳዎኔ ወርሴላይ ጋካናው ታ ኪታ ናጊዳዎ፣ አሳ ዛሪያ ኡባ ሞዳና ማላ፣ ታኒ ታ አወዋፔ አኬዳ ማታ ማላ አው አማና፤

«ኢ አሳ ዛሪያ ኡባ ቢራታ ፃሞዳን ሞዳናኔ ኡርቃፔ

ሜዴታ ሚሻ ሜንሊያዎዳን ሜንላና።»

28 ቃሲ ታኒ አው ባካሊያ ያለንቲያ አማና። 29 ሲሳናው ሃይላይ ዴዲያ ኡራይ ጌሻ አያናይ ዋሳ ጎሌቶ ጊያዋ ሲሶን ያጌ»

ያጋዴ ፃፋ።

3

(5) ዬሱሲ ሳርዴሳን ዴዲያ ዋሳ ጎሌው ጎዋ

1 «ሳርዴሳን ዴዲያ ዋሳ ጎሊያ ኪታንቻው ሃዋዳን ያጋዴ ፃፋ፡

ያሳ አያና ላፑናቲኔ ላፑ ያለንታቲ ዴዲያዌ ሃዋዳን ያጌ።

ታኒ ኔ ኪታ ኤራይ፤ አሳይ ኔና ሺምፑዋና ዴዳሳ ጊንቶካ፣ ኔኒ ሃይቃዳ። 2 ቤጎታ! አቲዳዎኔ ሃይቃናው ማቲዳዋ ሜንሌላ።

አዪሲ ጎፔ፣ ኔ ኪታይ ታ ያሳ ሲንላን ፖሎ ጊዴናዋ ታኒ ዴማዲ።

3 ሲሚ ኔኒ አኬዳዎኔ ሲሴዳዋ አኬካ፤ ናጋ፤ ኔ ናጋራፔካ ሲማ። ኔኒ ቤጎቲናዋ ጊደፔ፣ ታኒ ኔኮ ካዪሱዋዳን ያና፤ ታኒ ዋይሳዴ ያኔንቶ ኔኒ ኤራካ። 4 ሺን ባሬንቲ ማዩዋ ቁቲሲቤና አማሬዳ

አሳቲ ሳርዴሳን ኔና ዴዲኖ። አንቲንቲ ቦላ ማዩዋ ማዩዴ ታና ሃሜታና፤ አዪሲ ጎፔ፣ አንቲንቲ ቦላ ማዩዋ ማያናው ቤሲያዋንታ። 5 ያኒያዌ ሄዋዳንካ ቦላ ማዩዋ ማያና። ታኒ አ

ሱንላ ዴዐዋ ማፃፋፔ * ቁጨኬ፤ ታኒ ታ አቡ ሲንላኒኔ አ ኪታንቻቲዋ ሲንላን ኢ ታዋ ጊዲያዋ ማርካታና።

6 «ሲሳናው ሃይላይ ዴዲያ ኡራይ ጌሻ አያናይ ዋሳ ጎሌቶ ጊያዋ ሲሶን ያጌ»

ያጋዴ ፃፋ።

(6) ዬሱሲ ፒላዴሊፊያን ዴዲያ ዋሳ ጎሌው ጎዋ

7 «ፒላዴሊፊያን ዴዲያ ዋሳ ጎሊያ ኪታንቻው ሃዋዳን ያጋዴ ፃፋ፡

2:26-27 ማዝ 2:8-9 * 3:5 ዴዐዋ ማፃፋ፡ ያሳ አሳቲዋ ሱንላይ ያፌቲያ ማፃፋ። 3:5 ኬስ 32:32-33፤ ማዝ 69:28፤ ሳፀ 20:12፤ ማት 10:32፤ ሉቅ 12:8

«ዳዊቱ ቁልጥያ ተ ኦይቁዳዌ፡ ኦኒኔ ጎርዳናው ዳንዳዬናዳን ደዪያዌ፡ ቃሲ ኦኒኔ ደያናው ዳንዳዬናዳን ጎርዲያዌ ገሻይኔ፡ ቱማንቻይ ሃዋዳን ያጌ።

8 ታኒ ኔ ከታ ኤራይ። ቤዓ፡ ታኒ ኔ ሲንሳን ኦኒኔ ጎርዳናው ዳንዳዬና ፔንጊያ ዋላዲ፤ አዪሲ ጎፔ፡ ኔ ዋልቃይ ጉላ ጊደፔኔ፡ ታ ቃላ ናጋዳኔ ታ ሱንሳካ ኤሪኬ ጋቤይካ። 9 ቤዓ፡ አዪሁዳ ጊዲኪኖ ሺን ባሪና፡ «ኦኒኔ አዪሁዳ» ጊዴ ዋርደቲያ ሴፃና አዪሁዳ ዋሳ ጎሊያ ታኒ አሃዴ፡ ኔ ሲንሳን ጎይኒሳናኔ ኔና ሲቋያዋካ ኡንቱንታ ኤሪሳና። 10 ኔኒ ፔንጨዋን ታ አዛዙዋ ናጌዳ ዲራው፡ ሳዓን ዴዲያ አሳ ፓጫናው ኩሚንሳ ሳዓ ቦላ ዪያ ዋዪያ ዋዲያፔ ታኒካ ኔና ናጋና። 11 ታኒ ኤሌካ ያና፤ ኦኒኔ ኔ አከሊሊያ አኬና ማላ፡ ኔው ዴዲያዋ ሚኒሳ አይቃ። 12 ታኒ ያኒያ ኡራ ታ አዉዋ ገሻ ጎሊያን ቱሳ ኦላና፤ ኢ ሄዋፔ ኡባካ ኬሴና። ታኒ ታ ያሳ ሱንሳ፡ ታ ያሳ ካታማ ሱንሳኔ ታ ያሳ ማታፔ ዋቆና ኦራላ ዬሩሳላሚ ሱንሳ ኦ ቦላ ያፋና። ቃሲ ታኒ ታ ኦራላ ሱንሳካ ኦ ቦላ ያፋና።

13 «ሲሳናው ሃይላይ ዴዲያ ኡራይ ገሻ አያናይ ዋሳ ጎሌቶ ጊያዋ ሲሱ» ያጌ» ያጋዴ ያፋ።

(7) ዬሱሲ ሎዶቂያን ዴዲያ ዋሳ ጎሌው ጎዋ

14 «ሎዶቂያን ዴዲያ ዋሳ ጎሊያ ከታንቻው ሃዋዳን ያጋዴ ያፋ፡

«አማኔቲዳ ቱማንቻ ማርካይ፡ ያሳይ ሜዴዳዋ ኮይሩ፡ «አሚንዒ» ጊያዌ» ሃዋዳን ያጌ።

15 ታኒ ኔ ከታ ኤራይ። ኔኒ ኢርፃ ጊዳካ፤ ዋይ ሴሊያዋ ጊዳካ፤ ኢርፃ ዋይ ሴሊያዋ ጊዳሪኪ። 16 ኔኒ ኢርፃ ዋይ ሴሊያዋ ጊዳናን፡ ደምቦሎላ ጊዲያ ዲራው፡ ታኒ ኔና ታ ደናፔ ጨቻና ሃናይ። 17 አዪሲ ጎፔ ኔኒ፡ «ታኒ ዱሬ፤ ሚሻና ዴዳይ፤ ታና አይኔ ኮሽና» ያጋሳ። ሺን ኔኒ ሜቶቲያ አሳ፡ ቃሪሱያ አሳ፡ ሄዬሳ፡ ቆቃኔ ካሎቴዳ አሳ ጊዲያዋ ኤራካ። 18 ሄዋ ዲራው፡ ኔኒ ዱሬታና ማላ፡ ታማን ጌዬዳ ዋርቃ፡ ኔና ዬላዪያ ኔ ካሉዋ ካማናው ቦላ ማዩዋኔ ቃሲ ሎይላ ያላናው ኔ አይፊያ ኦኪያ ቆሊያ ታፔ ሻማናዳን፡ ታኒ ኔና ዘራይ። 19 ታኒ

† 3:7 ዳዊቱ ቁልጥያ፡ ሃዋ ጉሳይ ዳዊቱ ካዉቲላ አዪሱዋ ማታ ኦዲያዋ። 3:7 ኢሳ 22:22፤ ዮብ 12:14 3:9 ኢሳ 49:23፤ 60:14፤ 43:4

ሲቂያ ኡባ ሴራይኔ ሙራይ፤ ሲሚ ሎይላ ሴሌታ፤ ኔ ናጋራፔካ ሲማ።

20 <ቤዓ፥ ታኒ ካሬን ኤቃዴ ፃሳይ። ኦኒኔ ታኒ ፃሲያዎ ሲሲዴ፥ ካሪያ ዶዮፔ፥ ታኒ እኮ ጌላዴ አናና ኢቲፔ ካወዋ ማና፤ እካ ታናና ኢቲፔ ማና። 21 ቃሲ ታኒ ያናዴ ታ አወዋና ኣ ካወቲላ ኦይዲያን ኡቲዳዋዳን፥ ያኒያ ኡራው ታናና ታ ካወቲላ ኦይዲያን ኡቲያ ማታ ኢማና።

22 <ሲሲያ ሃይላይ ዴዒያ ኡራይ ጌሻ አያናይ ዋሳ ጎሎቶ ጊያዋ ሲሶ ያጌ) ያጋዴ ፃፋ» ያጌዳ።

4

ያሳይ ዮሃኒሳ ባሬ ካወቲላ ኦይዲያ ሲንላ አሄዳ

1 ሄዋፔ ጉዩያን፥ ታኒ ሳሉዋን ዶያ ፔንጊያ ቤዓዲ፤ ቃሲ ታው ማላካታዳን ኦዲሺን፥ ታኒ ሲሴዳ ኮይሮ ኮሻይ ታና፤ «ሃዋፔ ጉዩያን፥ ሃናናው ቤሲያዋ ታኒ ኔና ቤሳና፤ ሃ ኬሳ» ያጌዳ።

2 ኤሌካ ታኒ ጌሻ አያና ሞዴዋ ጊደ ጌላ አጋዲ። ቤዒቲ፥ ሳሉዋን ካወቲላ ኦይዲ ዴዒ፤ ሄ ኦይዲያን ኢቲ ኡቲዳ። 3 ሄ

ኡቲዳዋ ማላይ አልዎ ኢያሲዲዲያ ሹቻዳኒኔ አልዎ ሰርዲኖኔ ሹቻዳኒ ጸሌ። ካወታ ኦይዲ ዙሉዋን ዩዩ አጂዴ ኡባ ባጋና አልዎ ማርጊዲያ ሹቻዳን ጸሌ። 4 ሄ ካወቲላ ኦይዲያ ዩዩ አጂዴ፥ ሃራ ላታማኔ ኦይዲ ካወቲላ ኦይዲቲ ዴዒ፤ ኡንቲንቲን ቦላ ማዩዋ ማዩዴ፥ ሁጲያን ዋርቃ አኪሊሊያ ዋሌዳ ላታማኔ ኦይዲ ጨማቲ ኡቲዲኖ። 5 ካወቲላ ኦይዲያፔ ዋልቃንላይ፥ ኮሹንቻይኔ ጉጉንላ ጉንላይ ኬሴዳ፤ ቃሲ ካወቲላ ኦይዲያ ሲንላን ላፑ ያምፓቲ ፖዒኖ። ሄዋንቲ ያሳ ላፑ አያናቱዋ። 6 ካወቲላ ኦይዲያ ሲንላን ቢሪሊያ ማላቲያ ቡርጨኩዋ አባይ ዴዒ።

ሄ ካወቲላ ኦይዲያፔ ሲንላናኔ ጉዩና ኣ ማታን ዩዩ አጂዴ፥ አይሬ ኩሜዳ ኦይዲ ዴዒዋን ዴዒያ ሜጴታቲ ዴዒኖ። 7 ኮይሮ ዴዒዋን ዴዒያ ሜጴታይ ጋሙዋ ማላቲ፤ ላዒንሉ ሚዛ ማራ ማላቲ፤ ሄዜንሉዋ ሰምዒ አሳ ዴሙዋ ማላቲ፤ ቃሲ ኦይዴንሉ ፓሊያ አርጋንላ ማላቲ። 8 ኦይዲ ዴዒዋን ዴዒያ ሜጴታቶ ሁጲያን ሁጲያን ኡሱፑን ቂሬ ዴዒ፤ ኡንቲንቲ ቦላን ጋርሳንካ ኡባሳን አይሬ ኩሜዳ። ኡንቲንቲ ቃማኔ ጋላሲ።

3:19 ለም 3:12፤ ኢብር 12:6 4:2 ሂዝ 1:26-28፤ 10:1 4:5 ኬሲ
19:16፤ ሳፅ 8:5፤ 11:19፤ 16:18፤ ሂዝ 1:13፤ ሳፅ 1:4፤ ዛክ 4:2 4:6 ሂዝ
1:22፤ 5-10፤ 10:14

«ጌሻው፣ ጌሻው፣ ጌሻው፣
ካሴ ደዲያው፣ ሃዲካ ደዲያው፣
ቃሲ ሲንሳፔ ያናው፣
ጎዳው፣ ኡባፔ ዋልቃማ ያሳው»

ጌያዋ አገሲኖ። 9 ሄ ሜዴታቱ ካዉቴላ ኦይዲያን ኡቴዳ ሜዲ ሜዲናው ደዑዋን ደዲያዋ ማዚሙሪያን ሳቤዳ ዋዴ፣ ለንቹዳ ዋዴ፣ ጋላቴዳ ዋዴ፣ 10 ላታማኔ ኦይዲ ጨማቱ ካዉቴላ ኦይዲያን ኡቴዳ ሜዲ ሜዲናው ደዲያዋ ሲንሳን ጉፋኒዴ፣ ኣው ጎዴኒኖ፤ ባሬንቱ ኣኪሊሊያ ካዉቴላ ኦይዲያ ሲንሳን ዋሉዴ ሃዋዲን ያገሉ።

11 «ኑ ጎዳው ያሳው፣
ኔኒ ለንቹዋ፣
ሳባኔ ዋልቃ
ኣካናው ቤሳሳ።
ኣዪሲ ጎፔ፣
ኡባባ ኔኒ ሜዳዳ፤
ቃሲ ኡባባይካ
ኔኒ ኮዬዳዋዲን
ሃኔዳኔ ደዴዳ»
ያገሉ።

5

ማፃፋኔ ደርሳ

1 ኢቲ ፃፃቶ ማፃፋይ * ካዉቴላ ኦይዲያን ኡቴዳዋ ኡሽቻ ኩሽያን ደዲያዋ ቤዓዲ፤ ሄ ፃፃቶ ማፃፋይ ላዑ ባጋናካ ፃፊቲ ኡቴዳ፤ ቃሲ ላፑ ማታፋይ ኣ ሶላ ኣታሜቴዳ። 2 ታኒ ኢቲ ዋልቃማ ኪታንቻይ ባሬ ቃላ ቶቁ ኡዲዴ፣ «ማታፋ ደዪዴ፣ ፃፃቶ ማፃፋ ቢላናው ቤሲያ ኡራይ ኦኔ?» ያገሉ፣ ኣዋጂያዋ ቤዓዲ። 3 ሳሉዋን ገዲና ዋይ ሳዓን ገዲና፣ ዋይ ሳዓፔ ጋርሳን † ገዲና፣ ሄ ፃፃቶ ማፃፋ ቢላናው ዋይ ኣ ገዲዋ ፃላናው ኦኔኔ ቤሲያዋ ባዋ።

4 ፃላ ማፃፋ ቢላናው ዋይ ኣ ገዲዋ ፃላናው ቤሲያ ኡራይ ባይና ዲራው፣ ታኒ ዳር ዬካዲ። 5 ጨማቱዋፔ ኢቱ ታና፣ «ዬኮፓ፤

4:8 ሂዝ 1:18፤ 10:12፤ ኢሳ 6:2-3 * 5:1 ፃፃቶ ማፃፋ፣ ሃዋ ጉሳይ ዋራቃታን ዋይ ጋልባን ፃፊቲዳ ፃፂቲያ ማፃፋ ገዲዴ፣ ዳር ካሬ ባጋና ኢቲ ዋይ ላዑ ሶላ ባጋ ጋልባን ማታፋይ ኣታሜቴ። 5:1 ሂዝ 2:9-10፤ ኢሳ 29:11 † 5:3 ሳዓፔ ጋርሳን፣ ሃይቁዳዋንታ ጉሳ።

ቤዓ፣ ዩሁዳ ዛሪያ ገዴዳ ጋሙ፣ ዳዊቲ ዛሪ ምድ። ኢ ማታፋ ደያናዉኔ ፃፃቶ ማፃፋ ቢላናው ቤሴ» ያጌዳ።

6 ታኒ ካዉቲፋ ኦይዲያፕ፣ ዳዑዋን ዳዒያ ኦይዲ ሜዴታቲቲቲኔ ቃሲ ጨማቲቲቲ ገዲዋን፣ ሹኬቲዳ ዶርሳ ማላቲዳ ኤቄዳዋ ቤዓዲ፤ ኣው ላፑ ካጨቲኔ ላፑ ኣይፊቲ ዳዒኖ። ሄዋንቲ ኣላሚያ ኡባ ከቲቲዳ ያሳ ላፑ ኣያናቲቲ።

7 ሄ ዶርሳይ ቢዴ፣ ካዉቲፋ ኦይዲያ ቦላ ኡቲዳዋ ኡሹቻ ኩሺያፕ ፃፃቶ ማፃፋ ኣኬዳ። 8 ኢ ሄ ፃፃቶ ማፃፋ ኣኬዳ ዋዴ፣ ዳዑዋን ዳዒያ ኦይዲ ሜዴታቲኔ ላታማኔ ኦይዲ ጨማቲ ኣ ሲንሳን ኩንዳዲኖ። ኡንቲንቲ ሁጲያን ሁጲያን ዲላኔ ኢፃናይ ኩሚዳ ዋርቃ ሚሻ ኦይቄዲኖ። ሄ ኢፃናይ ጌሻቲ ያሳ ዋሲያዋ።

9 ኡንቲንቲ፣

«ፃፋ ማፃፋ

ኣካናዉኔ

ማታፋ ዶያዴ

ፃላናው ኔው ቤሴ።

ኣዪሲ ጎፔ፣

ኔኒ ሹኬታዳ።

ኔኒ ቆሙዋ ኡባፔ፣

ዲማ ዲማ

ጋዲያ ቃላ ኡባፔ፣

ያራ ኡባፔኔ

ዛሪያ ኡባፔ

ኔ ሱሳን

ያሳው ኣሳ ዋዛዳ።

10 ኑ ያሳው ኣላና ማላ፣

ኡንቲንታ ኔኒ

ካታቲቲኔ

ቄሳቲቲ ኣላዳ።

ቃሲ ኡንቲንቲ ሳዓን ሞዳና»

ያገዴ ኦራላ ማዚሙሪያ

ዩዲኖ።

11 ሄዋፕ ጉዪያን፣ ታኒ ፃላዴ፣ ካዉቲፋ ኦይዲያ፣ ዳዑዋን ዳዒያ ኦይዲ ሜዴታቲቲኔ ጨማቲቲ ዩዪ ኣዲዴ ኤቄዳ

5:5 ዶሞ 49:9፤ ኢሳ 11:1፤ 10 5:6 ኢሳ 53:7፤ ዛክ 4:10 5:8 ማዘ 141:2 5:9 ማዘ 33:3፤ 98:1፤ ኢሳ 42:10 5:10 ኬሰ 19:6፤ ሳፅ 1:6

ደሮ ኪታንቻቱዋ ኮሻ ሲሳዲ፤ ኡንቱንቱ ሻዓኒኔ ሚሎኒያን ፓይዴቴዲና። 12 ሄ ኪታንቻቱ ባሬንቱ ቃላ ቶቁ ኡዲዴ።

«ሹኬቴዲ ደርሳይ
 ዋልቃ፡ ዲሬቴላ፡
 ኣዲዲ ኤራ፡
 ሚኖቴላ፡
 ቦንቹዋ፡ ሳባ፡
 ጋላታ ኣካናው ቤሴ!»

ያጌዲኖ።
 13 ሄዋፔ ጉዪያን፡ ሳዓን፡ ሳሉዋን፡ ሳዓፔ ጋርሳኒኔ ኣባ ጊዲዋን ዴዲያ ሜዴታ ኡባይኔ ቃሲ ሄዋንቱን ዴዲያ ሜዴታ ኡባይ።

«ካወቴላ ኦይዲያ ቦላ
 ኡቴዳዎኔ ደርሳው

ጋላታይ፡ ቦንቹ፡
 ሳባይኔ ዋልቃይ
 ሜዲ ሚዲናው ጊዲ!»
 ያጊዴ ዩዲሺን ሲሳዲ።

14 ዴዐውን ዴዲያ ኦይዲ ሜዴታቱ፡ «ኣሜንዲ» ያጊና፡ ጨማቱ ጉፋኒዴ ሳዩኔዲኖ።

6

ሄ ፃፃታ ማፃፋ ማታፋ ደያ

1 ደርሳይ ላፑ ማታፋቱዋፔ ኢቱዋ ደዪሺን ቤዓዲ፤ ቃሲ ሼምፑዋና ዴዲያ ኦይዲ ሜዴታቱዋፔ ኢቱ ጉጉንላ ጉንላ ማላቲያ ኮሻን፡ «ሃ ያ!» ያጊያዋ፡ ታኒ ሲሳዲ። 2 ታኒ ኢቲ ቦላ ፓራ ቤዓዲ። ሄ ፓራ ቶጌዳዊ ዋንዳሬያ ኦዩቄዳ፤ ቃሲ ኣው ኣኪሊሊ ኢሜቴዳ። ኦላ ኢ ያኒዲኔ ቃሲካ ያናናው ኬሴዳ።

3 ደርሳይ ሳዒንሉ ማታፋ ደዬዳ ዋዴ፡ ሼምፑዋና ዴዲያ ሜዴታቱዋ ላዒንሉ፡ «ሃ ያ!» ያጊያዋ፡ ታኒ ሲሳዲ። 4 ቃሲ ሃራ ዳማ ፓራይ ኬሴዳ። ኣሳይ ኢቱ ኢቱዋና ሹኬታና ማላ፡ ሄ ፓራ ቶጌዳዋ ሳዓን ሳርቴላ ዲጊያ ዋልቃይ ኢሜቴዳ። ዋጋ ማሻይ ኣው ኢሜቴዳ።

5 ደርሳይ ሄዜንሉ ማታፋ ደዬዳ ዋዴ፡ ዴዐውን ዴዲያ ሜዴታቱዋ ሄዜንሉ፡ «ሃ ያ!» ያጊያዋ፡ ታኒ ሲሳዲ። ያታዴ

5:11 ዳን 7:10 6:2 ዛክ 1:8፤ 6:3፣ 6 6:4 ዛክ 1:8፤ 6:2

ካሬላ ፓራይ ኬሴዳዋ ቤዓዲ፤ ቃሲ ሄ ፓራ ቶጌዳዌ ባሬ ኩሺያን ሚዛኒያ ኦዩቁዳ። 6 ታኒ ዳዑዋን ዳዒያ ኦይዲ ሜዴታቱዋ ጊደፔ ኮሻ ማላቲያባ ሲሳዲ። ሄ ኮሻይ፡ «ኢቲ ጋላሳ ኦሶ ዲርጉ ባጋ ኪሉዋ ዛርጋ፤ ቃሲ ኢቲ ጋላሳ ኦሶ ዲርጉ ኢቲ ኪሉዋ ባጋ ባንጋ። ሺን ዛይቲያኔ ዋዩኒያ ኤሳ ቆሆፓ» ያጊያዋ ሲሳዲ።

7 ደርሳይ ኦይዴንሶ ማታፋ ደዬዳ ዋዴ፡ ዳዑዋን ዳዒያ ሜዴታቱዋ ኦይዴንሶ፡ «ሃ ያ!» ያጊያዋ፡ ታኒ ሲሳዲ። 8 ታኒ ጊራጩ ፓራይ ኬሴዳዋ ቤዓዲ። ሄ ፓራ ቶጌዳዋ ሱንሳይ ሃይቁዋ፤ ኦ ጌዲዋ ሲያሊ ካሌዳ። ሃይቁኔ ሲያሊ ሳዓፔ ኦይዴንሶ ኩሺያ ኦላን፡ ኮሻን፡ ሃርጊያን፡ ደዓን ዋዲሳና ማላ፡ ኡንቱንቱሲ ማታይ ኢሜቲዳ።

9 ደርሳይ ኢቼሼንሶ ማታፋ ደዬዳ ዋዴ፡ ኡንቱንቱ ያሳ ቃላ ኦዴዲ ዲራውኔ ባሬንቱ ማርካቲላን ኦሚኔቲዳ ዲራው፡ ሹኬዳ ኦሳ ሺዎፑዋ ያርሹዋ ያርሺያሳፔ ጋርሳን ቤዓዲ። 10 ኡንቱንቱ ባሬንቱ ቃላ ቶቁ ኡዲዳ፡ «ኡባ ዋዲያ ጎደው፡ ጌሻው፡ ቱማንቻው፡ ሳዓን ዳዒያ ኦሳ ቦላ ኦዴዴ ፒርደይ? ቃሲ ኦ ሱላ ኦዴዴ ጨጌታይ?» ያጌዲኖ። 11 ኡንቱንቶ ሁጲያን ሁጲያን ቦላ ማዩ ኢሜቲዳ፡ ኡንቱንቱዋዳን ሃይቃናው ቤሲያ ኡንቱንቱ ላጌላ ኦሳንቻቱዋ ፓይዲኔ ኡንቱንቱ ኢሻቱዋ ፓይዲ ኩማና ጋካናው፡ ኡንቱንቱ ኦማሬዳ ዋዲያ ታኪሻና ማላ፡ ኡንቱንቱሲ ኦዴቲዳ።

12 ደርሳይ ኡሱፑንሶ ማታፋ ደዬዳ ዋዴ፡ ታኒ ቤዓዲ፤ ቢታይ ሎይሲ ቃዴዳ፡ ኦዋይሬ ካሬላ ማዩዋዳን ካሬዴዳ፤ ኦጌናይካ ሙሌ ሱላ ማላቲዳ። 13 ባላሲያ ጊያ ሚላቲ ጋሚዒ ኦይሬ፡ ዋልቃማ ጫርኩ ቃሊና፡ ሳዓን ቆቆሬቲያዋዳን፡ ያለንታቱ ሳሉዋፔ ሳዓን ቆቆሬቲዲኖ። 14 ሳሉ ዓፄቶ ማፃፋይ ዓፄቲያዋዳን፡ ዓፄቲዳ ጳዩ ኦጌዳ፤ ዳሪ ኡባቱኔ ሃላን ደዳቲዳ ሳዓይ ኡባይ ባሬንቱ ዳዒያሳፔ ኪቹ ኦጌዲኖ። 15 ሃዋፔ ጉዩያን፡ ሳዓ ካታቱ፡ ዳሪያ ሞዲያዋንቱ፡ ሻላቃቱ፡ ዲራቱ፡ ዋልቃማቱ፡ ቃሲ ሃራ ኦሳይ ኡባይ፡ ኦይሌቱ፡ ዋማናቱ፡ ዳሪያ ኬሲዳ፡ ጎንጎሉዋ ጊደኒኔ ዳሪያን ዳዒያ ዛላ ጉዬ ባጋን ቆሱቲዲኖ። 16 ያቲዳ ዳሬቱዋኔ ሹቻ፡ «ካወቲላ ኦይዲያን ኡቲዳዋ ኦይሬያፔኔ ደርሳ ሃንቁዋፔ ኦ ቦላ ኩንዲዳ፡ ኦና ጌንጫርከቲሻ! 17 ኦዩሲ ጎፔ፡ ኡንቱንቶ ዋልቃማ ሃንቁዋ ጋላሳይ ጋኪኪቹዳ፤ ሄ ሃንቁዋ ዳንዲያናዌ ኦኔ?» ያጌዲኖ።

6:5 ዛክ 6:2፣ 6 6:8 ሃዘ 14:21 6:13 ኢሳ 34:4 6:15 ኢሳ 2:19፣ 21 6:16 ሆስ 10:8፤ ሉቅ 23:30 6:17 ኢዩ 2:11፤ ሚሊ 3:2

7

ኢስራዔሊያ አሳፔ 144000 አሳቴዎ ሶሞዒያን ማታፋይ ዎዴዳ

1 ሄዋፔ ጉዩያን፡ ታኒ ኦይዲ ኪታንቻቱ ኦይዲ ባጋ ሳዓ ጋፃን ኤቁዳዋንታ ቤዓዲ። ሄ ኪታንቻቱ ሳዓ ቦላን፡ ዎይ ኣባ ቦላን፡ ዎይ ኣይ ሚላ ቦላን፡ ጫርኩ ጫርኬናዳን ቱዔዲኖ።

2 ቃሲካ ዳዑዎ ያሳ ማታፋ ኦይቁዴ ሃራ ኪታንቻይ ኣዎይ ሞኪያሳፔ ኬሲያዎ ታኒ ቤዓዲ። ሄ ኪታንቻይ ባሬ ኮሻ ቶቁ ኡዲዴ፡ ሳዓኔ ኣባ ቆሃናው ዎልቃይ ኢሜቴዳ ኦይዲ ኪታንቻቱዎ

3 ዪሲዴ፡ «ኑ ያሳ ኦሳንቻቱዎ ዴሙዋን ኮኒ ማታፋ ዎላና ጋካናው፡ ሳዓ ጊዲና ዎይ ኣባ ጊዲና፡ ዎይ ሚላ ጊዲናካ ቆሆፕፔ» ያጌዳ።

4 ታኒ ያሳ ማታፋ ዴሙዋን ዎሴዳዋንቱ ፓይዲዎ ሲሳዲ። ኢስራዔሊያ ዛሪያ ኡባፔ ኢቲ ዪታኔ ኦይታማኔ ኦይዲ ሻዓ አሳቴዎ ዴሙዋን ማታፋይ ዎዴዳ።

5 ዪሁዳ ዛሪያፔ
ታማኔ ላዑ ሻዓ
ዴሙዋን ማታፋይ
ዎዴዳ።

ርቤላ ዛሪያፔ
ታማኔ ላዑ ሻዓ።
ጋዴ ዛሪያፔ
ታማኔ ላዑ ሻዓ።

6 ኣሴራ ዛሪያፔ
ታማኔ ላዑ ሻዓ።
ኒፍታሌሜ ዛሪያፔ
ታማኔ ላዑ ሻዓ።

ሚናሴ ዛሪያፔ
ታማኔ ላዑ ሻዓ።
7 ሲሞና ዛሪያፔ
ታማኔ ላዑ ሻዓ።

ሌዊያ ዛሪያፔ
ታማኔ ላዑ ሻዓ።
ዪሳኮራ ዛሪያፔ
ታማኔ ላዑ ሻዓ።

8 ዛቢሎና ዛሪያፔ

7:1 ኤርሞ 49:36፤ ዳን 7:2፤ ዛክ 6:5 7:3 ሂዝ 9:4፣ 6

ታማኔ ላዑ ሻዓ።
 የሴፎ ዛሪያፕ
 ታማኔ ላዑ ሻዓ።
 ቢኒያማ ዛሪያፕ
 ታማኔ ላዑ ሻዓ
 ዴሙዋን ማታፋይ
 ዋጴዳ።

ቦላ ማዩዋ ማዬዳ ጮራ አሳቱዋ

9 ሄዋፔ ጉዩያን፣ ዛሪያ ኡባፔ፣ ቆሙዋ ኡባፔ፣ ያራ ኡባፔኔ ዲማ ዲማ ጋዲያ ቃላ ኡባፔ ኦኒኔ ፓይዳናው ዳንዳዬና ዛዋይ ባይና ጮራ አሳ ታኒ ቤዓዲ። ሄ አሳይ ቦላ ማዩዋ ማዬዳ፣ ዛምባ ሃይላ ባሬንቱ ኩሺያን ኦይቂዳ፣ ካዉቴላ ኦይዲያ ሲንላኒኔ ዶርሳ ሲንላን ኤቆዳ። 10 ኡንቱንቱ ባሬንቱ ቃላ ጴቁ ኡዲዳ።

«ኑ አቶቴላይካ
 ካዉቴላ ኦይዲያን
 ኡቴዳ
 ኑ ያሳፔኔ
 ዶርሳፔ ዬ»
 ያጌዲኖ።

11 ኪታንቻቱ ኡባይ ካዉቴላ ኦይዲያ፣ ጨማቱዋኔ ዴዑዋን ዴዲያ ኦይዲ ማጴታ ዩዩ አጲዴ ኤቆዲኖ። ኡንቱንቱ ካዉቴላ ኦይዲያ ሲንላን ባሬንቱ ዴሙዋን ጉፋኒዴ ያሳው ጎዩኒዴ።

12 «አሜንዒ!
 አንጁ፣ ቦንቹ፣
 አጴዳ ኤራቴላይ፣
 ጋላታይ፣ ሳባይ፣
 ዋልቃይ፣ ሚኖቴላይ
 ማጲናፔ ማጲና ጋካናው
 ኑ ያሳው ጊድ።
 አሜንዒ!»
 ያጌዲኖ።

13 ጨማቱዋፔ ኢቱ ታና፣ «ሃ ቦላ ማዩዋ ማዬዳ አሳቱ ኦኔ? ኡንቱንቱ ሃቃፔ ዬዲኖ?» ያጊዴ ኦቹዳ።

14 ታኒ፣ «ታ ጎዳው፣ ኔኒ ኤራሳ» ያጋዲ። ኢ ታና ሃዋዳን ያጌዳ፤

«ሃዋንቱ ዳሮ ዋዩያ
 ዋዬቲዴ ዬዳዋንታ።»

ኡንቱንቱ ባሬንቱ ማዩዋ
 ደርሳ ሱላን ሜጨዳ
 ቦፃዳዋንታ።
 15 ሄዋ ዲራው፥
 ኡንቱንቱ ያሳ ካዉቲላ ኦይዲያ
 ሲንላን ኤቁዴ፥
 ቃማኔ ጋላሲ
 ኦ ጌሻ ጎሊያን
 ኦው ኦሊኖ።
 ቃሲ ኢ ባሬ ካዉቲላ ኦይዲያን
 ኡቴዳዌ
 ኡንቱንቱ ጊዲዋን ዳዕና።
 16 ሃዋፔ ሲንላናው ኡባካ
 ኡንቱንቱ ኮሻቲኪኖ
 ዋይ ሳሜቲኪኖ።
 ኦዋይ ኡንቱንታ ሜና፤
 ቃሲ ኦይ ሴላይካ ኡንቱንታ ጉዳና።
 17 ኦዩሲ ጎፔ፥
 ካዉቲላ ኦይዲው
 ጊዲዋን ኡቴዳ ደርሳይ
 ኡንቱንታ ሄማና።
 ዴዑዋ ሃላ ፑልቱዋኮካ
 ኡንቱንታ ካሌላና።
 ያሳይካ
 ኡንቱንቱ ኦይፊያ ኦራላ ኡባ ቁጨዲጋና»
 ያጌዳ።

8

ፃፃፋ ማፃፋ ላፑንላ ማታፋይ ደዬቲዳ
 1 ደርሳይ ላፑንላ ማታፋ ደዬዳ ዋዴ፥ ባካ ሳቲያ ጊዲያዋ
 ኬና ሳሉ ጮዑ ጌዳ።
 2 ሄዋፔ ጉዩያን፥ ታኒ ላፑ ኪታንቻቱዋ ያሳ ሲንላን ኤቁያዋንታ
 ቦዳዲ፤ ኡንቱንቱሲ ላፑ ማላካታይ ኢሜቲዳ።
 3 ኢፃና ጨዋዩያ ዋርቃ ሚሻ ኦይቁዳ ሃራ ኪታንቻይ ዩዴ፥
 ያርሺያሳ ማታን ኤቁዴ። ዋርቃፔ ሜዴቴዳ ያርሺያሳይ ካዉቲላ

7:14 ዳን 12:1፤ ማኮ 24:21፤ ማር 13:19 7:16 ኢሳ 49:10 7:17
 ማዝ 23:1፣ 2፤ ሃዝ 34:23፤ ኢሳ 49:10፤ 25:8

አይዲያ ሲንላን ዴዔ፤ ሄ ያርሺያሳ ቦላ ጌሻ ኡባቱዋ ዋሳ ጉጅና ማላ፡ ኪታንቻው ዳሮ ኢፃናይ ኢሜቲዳ። 4 ኢፃና ጨዋይ ጌሻቱዋ ዋሳና ኢቲፔ ሄ ኪታንቻ ኩሺያፔ ፑዴ ያሳኮ ቤዳ። 5 ሄዋፔ ጉዲያን፣ ኪታንቻይ ኢፃና ጨዋዪያዋ ኣኪዴ፣ ያርሺያሳፔ ታማ ቦንቁዋ ኣኪዴ፣ ኣኒ ኩንሴዳ። ሄ ኢፃና ጨዋዪያዋ ዲጌ ሳዓ ኦሊና፣ ጉጉንሳይ ጉሜዳ። ዋልቃንሳይ ዋልቃሜዳ፤ ቃሲ ቢታይካ ቃዳዳ።

ማላካታቱ ፑኔቲዲኖ

6 ቃሲ ላፑ ማላካታ ኦይቂዴ ላፑ ኪታንቻቱ ማላካታ ፑናናው ጊጌዲኖ።

7 ኮይሮ ኪታንቻይ ባሬ ማላካታ ፑኒና ሱላና ዋላኬቲዳ ሻቻይኔ ታማይ ሳዓን ቡኬዳ። ሳዓፔ ሄዜንላ ኩሺ ጉዴቲዳ፤ ሚላፔካ ሄዜንላ ኩሺ ጉዴቲዳ፤ ማታ ኡባይካ ጉዴቲዳ።

8 ላዔንላ ኪታንቻይካ ባሬ ማላካታ ፑኔዳ። ዋልቃማ ዴሪያ ማላቲያባይ ታማን ኤዲዴ፣ ኣባን ዩጌቲዳ፤ ያቲና፣ ኣባፔ ሄዜንላ ኩሺ ሱላ ጊዴዳ። 9 ኣባን ዴዑዋን ዴዒያ ሜዴታቱዋ ሄዜንላ ኩሺ ሃይቄዳ፤ ማርካቤቱዋፔካ ሄዜንላ ኩሺ ቆዬዳ።

10 ሄዜንላ ኪታንቻይ ባሬ ማላካታ ፑኒና ሻፋፔኔ ፑልቱዋ ሃላፔ ሄዜንላ ኩሺያ ቦላ ሳሉዋፔ ያምፒያዳን ኤዲያ ዋልቃማ ያለንቲ ዋዴዳ። 11 ሄ ያለንቲያ ሱንሳይ ጫሙዋ ጌቲቲ። ሃላፔ ሄዜንላ ኩሺ ጫሜዳ፤ ቃሲ ሃላይ ጫሜዳ ዲራው፣ ዳሮ ኣሳይ ሄ ሃላ ኡሺዴ ሃይቄዳ።

12 ኦይዴንላ ኪታንቻይ ባሬ ማላካታ ፑኔዳ። ኣዋፔ፣ ኣጌናፔኔ ያለንቲያፔ ሄዜንላ ኩሺ ዴሺቲዳ፤ ኤንቲንቲ ፖዑዋፔካ ሄዜንላ ኩሺ ቆሚዳ። ሄዋ ዲራው፣ ጋላሳፔ ሄዜንላ ኩሺ፣ ቃማፔካ ሄዜንላ ኩሺ ቆሚዳ።

13 ኢቲ ኣርጋንሳይ ሳሉዋን ፓሊያዋ ታኒ ቤዓዲ። ሄ ኣርጋንሳይ ባሬ ቃላ ቆቁ ኡዲዴ፣ «ሄዙ ኪታንቻቱ ፑናና ቤሲያ ዮኮ ማላካታይ ፑኔቲያ ዋዴ፣ ሳዓን ዴዒያ ኣሳው ኣዬሮ! ኣዬሮ! ኣዬሮ!» ያጊያዋ ሲሳዲ።

8:3 ኣዋ 9:1፤ ኬሰ 30:1፣ 3 8:5 11:19፤ 16:12፣ 18፤ ሂዝ 10:2፤ ኬሰ 19:16 8:7 ኬሰ 9:23-25፤ ሂዝ 38:22 8:10 ኢሳ 14:12 8:11 ኤርዋ 9:15 8:12 ኢሳ 13:10፤ ሂዝ 32:7፤ ኢዩ 2:10፣ 31፤ 3:15

9

1 ሃዋፔ ጉዩያን፣ ኢቼሽንሶ ኪታንቻይ ባሬ ማላካታ ፑኒና ሳሉዋፔ ዲጌ ሳዓ ኩንዴዳ ያለንቲያ ቤዓዲ። ሄ ያለንቲው ጨሞ ኦላ * ቁልፒ ኢሜቲዳ። 2 ያለንቲ ጨሞ ኦላ ዶዬዳ፤ አኮ ጮጪያፔ ኬሲያ ጩዋ ማላ ጩዋይ ሄ ጨሞ ኦላፔ ኬሴዳ። ቃሲ አዋይኔ ሳዓይ ሄ ጨሞ ኦላፔ ኬሴዳ ጩዋን ቋሚዲኖ።

3 ጩዋፔ ቦሊ ዲጌ ሳዓ ዬዳ። ሳዓን ዴዒያ ሶጋቶ ዴዒያ ዋልቃ ማላ ዋልቃይ ቦሊዉካ ኢሜቲዳ። 4 ያሳ ማታፋይ ዴሙዋን ባይና አሳ ያላላ ቆሃናፔ አቲን፣ ሳዓን ዴዒያ ማታ ዋይ አጪያ ሚላ ጊዲና ዋይ አይ ሚላ ጊዲናካ ቆሄና ማላ፣ ቦሊው ኦዴቲዳ።

5 ቦሊ ሄ አሳ ኢቼሹ አጌና ጊዲያዋ ፓፃ ካዓና ማላ፣ ማታይ ኢሜቲዳዋፔ አቲን፣ አው አሳ ዋቋናው ማታይ ኢሜቲቤና። ሶጉ አሳ ዲኪዴ ሴሊሲያዋ ከና ቦሊ ሴሊሴ። 6 ሄ ጋላሳቱዋን አሳይ ሃይቁዋ ኮያና፤ ሽን ዴሜና። ቃሲ ሃይቃናዉካ አዋታና፤ ሽን ሃይቁ አሳፔ ባቃታና።

7 ቦሊ ኦላው ጊጊ ኡቲዳ ፓራ ማላቲ። ቦሊያ ሁጲያን ዋርቃ ማላቲያ አኪሊሊ ዴዒ፤ አ ዴሙካ አሳ ዴሙዋ ማላቲ። 8 አ ቢናናይካ ማጫ አሳ ቢናናይዳ አዲቄ፤ አ አቻይካ ጋሙዋ አቻ ማላቲ። 9 አ ቲራይ ቢራታን ኦሌዳ ጎንዳሊያ ማላቲያዋን ጎዜቲ ኡቲዳ፤ ቃሲ አ ቄፊያ ኮሻይ ኦላ ባናው ፒሪዔያ ፓራቲ ጎቼያ ጋሪያ ኮሻ ማላ። 10 አው ሶጉዋ ዲፊያ ማላቲያ ዲፊ ዴዒ፤ አ ዲፊያን ዲኪያባይ ዴዒ። ሄ ዲፊያን ኢቼሹ አጌና ጊዲያዋ አሳ ቆሃናዳን፣ አው ማታይ ኢሜቲዳ። 11 አ ሞዲያ ካቲ ዴዒ። ሄ ካቲ ጨሞ ኦላ ኪታንቻ። አ ሱንሳይካ ኢብራዩስዔ ቃላን አቢዶና፤ ቃሲ ጊሪኬ ቃላን አጸሊዮና ጌቲቲ። አጸሊዮና ጊያዋ ቢሌሳይ፣ ቋዩሲያዋ ጊያዋ።

12 ኮይሮ አዬሮ ጊያዌ አዴዳ፤ ቤዓ፣ ቢሮ ሃራ ላው አዬሮ ጊያዌ ያናዋ።

13 ኡሱፑንጎላ ኪታንቻይ ባሬ ማላካታ ፑኒዳ። ያሳ ሲንሳን ኤቄዳ ዋርቃፔ ሜዴዳ ያርሺያሳን ዴዒያ ኦይዱ ጋፃ ካጩቱዋፔ አቲ ኮሻ ሲሳዲ። 14 ሄ ኮሻይ ማላካታይ ዴዒያ ኡሱፑንጎላ ኪታንቻ፣ «ኤፊራዔሳ ጊያ ዋጋ ሻፋን ቃሽቲዳ ኦይዱ ኪታንቻቱዋ ቢላ»

* 9:1 ጨማ ኦላ፡ ሃዋ ጉሳይ ጋርሳ ባጋ ቢታን ዳሪሲ ጨማቲዴ ዴዒያ ኢታ አያናቲ ባራንቱ ዉርሴላ ሙራ ጋላሳይ ጋካናው ቃሽቲዴ ዴዒያሳ። 9:2 ደሞ 19:28 9:3 ኬስ 10:12-15 9:4 ሂዝ 9:4 9:6 ዮብ 3:21፤ ኤርሞ 8:3 9:7 ኢዩ 2:4 9:8 ኢዩ 1:6 9:9 ኢዩ 2:5 9:13 ኬስ 30:1-3

ያጌዳ። 15 እሳ ዛሪያፔ ሄዜንሉ ኩሺያ ዋጃናው፣ ሃ ሳቲያሲ፣ ጋላሳሲ፣ አጌናሲኔ ላይላሲ ገገሲ ዋሌዳ፣ ኦይዲ ከታንቻቱ ቢሌቲዲና። 16 አላ ፓራ ቶጊያ እሳ ፓይዲ ላዑ ፃቱ ሚሎኔ ገዲያዋ ታኒ ሲሳዲ።

17 ቃሲካ ታኒ ሳፃን ፓራቱዋኔ ሄ ፓራቱዋ ቶጌዳ እሳ ቤዓዲ። እሳው ቲራን ዋሌያ ቢራታ ጎንዳሊያ ማላይ ዳዔ። ሄ ቲራን ዋሌያ ቢራታ ጎንዳሊያ ማላይ ታማዳን ዞፆ፣ ሳማዬያ፣ ቃሲ ኤዲያ ዲኒያ ማላ። ፓራቱዋ ሁጺ ጋሙዋ ሁጺያ ማላ። ኡንቱንቱ ዶናፔ ታማይ፣ ጨዋይኔ አዲሊያ ጨሻ ማላቲያ ኤዲያ ዲኒያ ታማይ ኬሴዳ።

18 ፓራቱዋ ዶናፔ ኬሴዳ ታማን፣ ጨዋኒኔ ኤዲያ ዲኒያን ሃ ሄዙ ቦሻቱዋን እሳ ዛሪያፔ ሄዜንሉ ኩሺ ሃይቄዳ። 19 አዪሲ ጎፔ፣ ፓራቶ ዋልቃይ ዶናኒኔ ዲፊያን ዳዔ። ኡንቱንቱ ዲፊካ ሁጺያና ዳዔያ ሸሻ ማላቲ፣ ሄዋን ኡንቱንቱ እሳ ቆሃና።

20 ሃ ቦሻቱዋን ሃይቄናን አቲዳ እሳይ ባሬ ኩሺያን ኦሊያዋ አገቤና። ቃሲ ዋርቃፔ፣ ቢራፔ፣ ናሃሲያ ጌቲቲያ ቢራታፔ ሹቻፔኔ ሚላፔ ኦሴቲዳ፣ ፃላናው ዋይ ሲሳናው ዋይ ሃማታናው ዳንዳዬና ኤቃሲኔ ፃላሄያሲ ጎዪኒያዋካ አገቤና። 21 እሳይ ኤሪዲ ዋጂዳዋ፣ ዋይ ባሬ ቢቲዳዋ፣ ዋይ ባሬ ዋሹሜዳዋ፣ ዋይ ባሬ ወዔዳዋ አገዳ፣ ባሬ ናጋራፔ ሲሚቤና።

10

ከታንቻኔ ጉላ ማፃፋ

1 ቃሲካ ታኒ ሃራ ዋልቃማ ከታንቻይ ሳሉዋፔ ኬሲዳ፣ ዲጌ ዋጂያዋ ቤዓዲ። ሻሪያ ኢ ማዬ ኡቲዳ፣ ቃሲ ዙሉ አ ሁጺያ ዩዩ አጂ ኡቲዳ። አ ዳሙካ አዋ ማላ፣ አ ጌዲካ ታማ ቱሳ ማላ።

2 ሄ ከታንቻይ ዶያ ዳዔያ ኢቲ ጉላ ፃፃቶ ማፃፋ ባሬ ኩሺያን ኦይቄዳ። ባሬ ኡሺቻ ጌዲያ እባ ቦላ ኤሲዳ፣ ባሬ ሃዲርሳ ጌዲያ ቢታ ቦላ ኤሴዳ። 3 ጉዲያ ጋሙዋዳን፣ ዋልቃፔ ጉዳዳ። ኢ ጉዳዳዋፔ ጉዪያን፣ ላፑ ዳዳቱ አናና ጉንላን ሃሳዬዲና።

4 ኡንቱንቱ ጉሜዳ ዋዴ ታኒ ፃፋናው ቆፓዲ። ሺን ሳሉዋፔ፣ «ላፑ ዳዳቱ ሃሳዬዳዋ እሳው ቃቶፓኔ ፃፎፓ» ያገያ ኮሻይ ታው ሲሴቲዳ።

5 ሄዋፔ ጉዬ፣ አባ ቦላኒኔ ቢታ ቦላን ኤቄዳዲሺን ታኒ ቤዔዳ ከታንቻይ፣ ባሬ ኡሺቻ ኩሺያ ሳሉዋ ፑዳ ሚጨዳ። 6 ሳሉዋኔ

9:20 ማዝ 115:4-7፣ 135:15-17፣ ዳን 5:23 10:5 ኬሰ 20:11፣ ዛር 32:40፣ ዳን 12:7፣ አዋ 3:7

ሳሉዋን ደዲያ ኡባባ፣ ሳዓኔ ሳዓን ደዲያ ኡባባ፣ አባኔ አባን ደዲያ ኡባባ፣ ማጺዳ ማጺ ማጺናው ደዲያ ያሳ ሱንሳን ጨቄዳ። ያተዳ፣ «ዎዲ ዉራናው ጋሚዔና። 7 ሺን ላቸንሳ ኪታንቻይ ባሬ ማላካታ ቸኒያ ዎዳ፣ ያሳይ ናባቱዋ ጊዳዳ ባሬ አሺካሬቶ ቃላ ኡዲ ዎጤዳዎዳንካ፣ ኢ ፀ-ሬዳ ቆፋይ ፖሌታና» ያጌዳ።

8 ሄዋፔ ጉዩያን፣ ሳሉዋፔ ሃሳዩሺን ታኒ ሲሴዳ ኮሻይ ላዒንሱዋ ዛሬዳ ታና፣ «አባ ቦላኒኔ ቢታ ቦላን ኤቄዳ ኪታንቻ ኩሺያን ደያ ደዲያ ፃፃቶ ማፃፋ ባዳ አካ» ያጊያዋ ሲሳዲ።

9 ታኒ ሄ ኪታንቻኮ ባዳ፣ ጉሳ ፃፃቶ ማፃፋ ታው ኢማና ማላ፣ አ ኦቻዲ። ኢ ታና፣ «አካዳ ማ፤ ማፃፋይ ኔ ኡሉዋ ጫሚሳናዎ፤ ሺን ኔ ደናን ኤሳዳን፣ ኢ ማልዓናዎ» ያጌዳ።

10 ሄዋፔ ጉዩ፣ ታኒ ኪታንቻ ኩሺያፔ ሄ ጉሳ ፃፃቶ ማፃፋ አካዳ ማዲ፤ ታ ደናን ማፃፋይ ኤሳዳን ማልዒዳ። ሺን ታኒ ማዳዋፔ ጉዩያን፣ ታ ኡሎ ጊድ ጫሚዳ። 11 ቃሲካ ታና፣ «ያራ ኡባ፣ ዛሬያ ኡባ፣ ዲማ ዲማ ቢታ ቃላኔ ካታቱዋባ ኔኒ ቲምቢቲያ ቃንፃናን ሃሳያናው ቤሴ» ያጌዳ።

11

ላዑ ማርካቱዋ

1 ሄዋፔ ጉዩ፣ ማቃ ማላቲያ ሊኪያ ፃምዓይ ታው ኢሜቲዳ፤ ታና ጌዳዌ ሃዋ፤ «ባዳ ያሳ ጌሻ ጎሊያኔ ያርሺያሳ ሊካ። ሄዋን ጎዪኒያዋንታካ ፓይዳ። 2 ሺን ጌሻ ጎሊው ካሬ ባጋ አጋ ባሻ፤ ሄዋ ሊኮፓ። አዩሲ ጎፔ፣ ሄ ሳዓይ አዩሁዳ ጊዳና አሳው ኢሜቲዳ። አዩሁዳ ጊዳና አሳይ ጌሻ ካታማ ኦይታማኔ ላዑ አጌናው ዩቆና።

3 ታኒ ጋቢያ ማዬዳ ታ ላዑ ማርካቱዋ ኪታና፤ ኡንቱንቱ አቲ ሻዓኔ ላዑ ፃታኔ ኡሱቸን ታው። ጋላሳን ያሳ ኪታ ኦዳና» ያጌዳ።

4 ሄ ላዑ ማርካቱ ሃ ሳዓ ጎዳ ሲንሳን ኤቄያ ፃምፒያ ዎሴያ ላዑ ባላቱዋ። 5 ኦኒኔ ኡንቱንታ ቆሃናው ኮዮፔ፣ ኡንቱንቱ ደናፔ ታማይ ኬሲዳ ኡንቱንቱ ሞርኬቱዋካ ቆዩሴ። ቃሲ ኦኒኔ ኡንቱንታ ቆሃናው ኮዮፔ፣ ሄዋዳንካ ሃይቃና። 6 ኡንቱንቱ ያሳ ኪታ ኡዲያ ዎዲያን ኢራይ ቡኩናዳን፣ ሳሉዋ ጎርዳናው ኡንቱንቱሲ ማታይ ደዒ። ኡንቱንቱሲ ሃሳ ሱሳ ኬሲያ ማታይካ ደዒ፤ ቃሲ ኡንቱንቱ ባሬና ኮሺያ ዎዳ፣ ሳዓ ዲማ ዲማ ቦሻን ሸጫናው ኡንቱንቱሲ ማታይ ደዒ።

10:8 ሂዝ 2:8-3:3 11:1 ሂዝ 40:3፤ ዛክ 2:1-2 11:2 ሉቅ 21:24
11:4 ዛክ 4:3፣ 11-14 11:6 1ካት 17:1፤ ኬሰ 7:17-19፤ 1ሳም 4:8

7 ኢንቴንቴ ባሬንቴ ማርካቴላ ወርሴዳዋፕ ጉዩያን፣ ጨዋ ኦላፕ ፑዴ ኬሲያ ደዓይ ኢንቴንቴና ኦሌታና። ሄ ደዓይ ኢንቴንታ ያኒዴ ዎቆና። 8 ኢንቴንቴ ጎዳይ ማሰቃሊያ ቦላን ሚሲማሪያን ጂሼቲዴ ሱሌቲዳ ካታማ ዎጋ ኦጊያን ኢንቴንቴ ኦጋይ ጊሳናዎ። ሄ ካታማይ ለሚሱዋን ሶዶማ ዎይ ጊብፃ ጌቲቲዴ ያሴቲ። 9 ቃሲ ያራ ኡባፕ፣ ቆሙዋ ኡባፕ፣ ዲማ ዲማ ቢታ ቃላፕኔ ዛሪያ ኡባፕ ዬዳ ኦሳይ ኢንቴንቴ ኦጋ ሄዙ ጋላሳኔ ባጋ ቤዓና። ኦጋይ ሞጌቲና ማላ፣ ሄ ኦሳይ ዲጋና። 10 ሳዓን ዴዒያ ኦሳይ ሃ ቲምቢቲያ ኦዲያ ላዑ ኦሳቲዋ ሃይቁዋን ናሼታና። ኦሳይ ኢንቴንቴ ሃይቁዋ ኢቲ ኢቲዋና ኦሞታ ላሚቲዴ ቦንቻናዎ፤ ኦዴሲ ጎፕ፣ ሳዓን ዴዒያ ኦሳ ኢንቴንቴ ዳሪሲ ሜቶሴዲኖ።

11 ሄዙ ጋላሳኔ ባጋፕ ጉዩያን፣ ዴዑዋ ሼምፑዋ ያሳይ ኢንቴንቴን ሼምፒና፣ ኢንቴንቴ ዴንዲ ኤቁዲኖ። ኢንቴንታ ቤዔዳ ኡባይ ኢታ ያሻ ያዬዳ። 12 ሄዋፕ ጉዩያን፣ ሄ ቲምቢቲያ ኦዲያ ላዑ ኦሳቲ ሳሉዋፕ፣ «ሃ ፑዴ ኬሲቲ» ጊያ ዎልቃማ ኮሻ ሲሴዲኖ። ባሬንቴ ሞርኬቲ ባሬንታ ያሊሺን፣ ኢንቴንቴ ሻሪያን ጌሊዴ፣ ፑዴ ሳሉዋ ቤዲኖ።

13 ሄ ሳቲያን ቢታይ ሎይሊ ቃዲና ካታማፕ ታሙንላ ኩሺ ቆዬዳ። ቃሲ ቢታ ቃላን ላፑ ሻዓ ኦሳይ ሃይቁዴ። ኦቲዳ ኦሳይ ሎይሊ ኮኮሪ ያዬዴ፣ ሳሉዋ ያሳ ጊታቴላ ሳቤዳ።

14 ላዔንሉ ኦዬሮ ጊያዌ ኦጂዳ። ሺን ኦኬኪቲ፤ ሄዜንሉ ኦዬሮ ጊያዌ ኤሌካ ያናዎ።

ላፑንላ ማላካታ

15 ሄዋፕ ጉዩያን፣ ላፑንላ ኪታንቻይካ ባሬ ማላካታ ፑኔዳ።

ሳሉዋን፣
 «ኦላሚያ ካወቲላይ
 ሃዒ ኑ ጎዳሳኔ
 ኦ ኪሪሰቶሳሳ፤
 ቃሲ ሜጲናፕ ሜጲና ጋካናው
 ኢ ሞዳና»
 ያጊያ ዎልቃማ ኮሻይ ሲሴቲዳ።

16 ባሬንቴ ኦይዲያን ኡቲዳ ላታማኔ ኦይዲ ጨማቲ ያሳ ሲንላን ዲጌ ጉፋኒዴ፣ ያሳው ጎዩኒዴ ሃዋዳን ያጌዲኖ፤

17 «ሃዒ ዴዒያዎ፣

11:7 ዳን 7:7፣ 21፤ ሳሰ 13:5-7፤ 17:8 11:8 ኢሳ 1:9-10 11:11 ሄዝ 37:10 11:12 2ካት 2:11 11:15 ኬስ 15:18፤ ዳን 2:44፤ 7:14፣ 27

ካሴፔካ ደዲያዎ፥
 ጎዳው፥
 ኡባፔ ዋልቃማ ያሳው፥
 ኔው ዋልቃማ ዋልቃይ
 ደዲያ ዲራውኔ
 ኔኒ ሞዳናው
 ደሜዳ ዲራው፥
 ኑኒ ኔና ጋላቴቶ።
 18 አዩሁዳ ገደና አሳይ ሃንቁቴዳ፤
 ኔ ሃንቁካ ዬዳ።
 ሃይቁዳዋንቱ
 ፒርዳቴያ ዋዲ ሃዓ፤
 ቃሲ ኔኒ ኔ ኦሳንቻቶ፥
 ናባቶ፥
 ጌሻቶ፥
 ኔ ሱንሳው ያዩያዋንቶ፥
 ጶቃቶኔ ላፋቶ
 ኡንቱንቱ ኦሱዋዳን
 ኢሚያ ዋዲካ ሃዓ።
 ሳዓ ጳዩሲያዋንታካ
 ኔኒ ጳዩሲያ ዋዲ ሃዓ»
 ያጌዲና።

19 ሳሉዋን ደዲያ ያሳ ጌሻ ጎሊ ደዬቴዳ፤ አ ጌሻ ጎሊያን ያሳ ቃላ ጫቀዋ ታቦታይ ቤቴዳ። ቃሲ ዋልቃንሳይ ዋልቃሜዳ፤ ጉንሳይ ሲሴቴዳ፤ ጉጉንሳይ ጉሜዳ፤ ቢታይ ቃዳዳ፤ ዋልቃማ ሻቻይካ ሻጩዳ።

12

ታኒ ሚሺራቶ፥ ናዓኔ ዳዊያ ቤዓዲ

1 ሄዋፔ ጉዩያን፥ ሳሉዋን ዋልቃማ ማላይ ቤቴዳ። አዋ ማዬዳ ኢቲ ሚሺራታ፥ አጌና ቦላ ኤቁዳዉና፥ ታማኔ ላዑ ያሊንቲያ አኪሊሊያ ባሬ ሁጲያን ዋሌዳዉና ሄዋን ደዓው። 2 ሄ ሚሺራታ ሻሃራ፤ ኢዞ ዬሉዋ ኦይላይ፥ ኡንዔሊና ዋሳዲ።

3 ሃራ ኢቲ ዋልቃማ ማላይ ሳሉዋን ቤቴዳ። ታሙ ካጨያና ደዲያ ላፑ ሁጲያን አኪሊሊያ ዋሌዳ ኢቲ ዋልቃማ ዘያ ዳዊ ደዓ። 4 ሄ ዳዊ ባሬ ዱፊያን ሄዜንሶ ኩሼ ያሊንቲያ ሳሉዋፔ

ዳፊዴ፡ ሳፃን ኦሌዳ፡ ሄ ዳዊ ዩሌቲ ዋጵሳናካ ናፃ ማናው ዩላና ሃኒያ ሚሺራቲ ሲንሳን ኤቄዳ፡፡

5 ሚሺራታ ኣቱማ ናፃ፡ ኣዪሁዳ ጊዴና ኣሳ ኡባ ቢራታ ፃምዓን ሞዳናዎ ዩላዲ፡፡ ሺን ናፃይ ያሳኮኔ ኣ ኣራታኮ፡ ፑዴ ኤሌካ ኣከቴዳ፡፡ 6 ሚሺራታ ኢቲ ሻፃኔ ላዑ ጃታኔ ኡሱፑን ታሙ ጋላሳው ሚዚዴኔ ኡሺዴ ዎላናው ያሳይ ገገሲ ዎሌዳ ሳፃ ባዙዎ ባቃታዲ፡፡

7 ሄዎፔ ጉዪያን፡ ሳሉዎን ኦላይ ዴንዴዳ፡፡ ሚካዔሊ ባሬ ኪታንቻቱዎና ኢቲፔ ዳዊያ ኦሌቴዳ፤ ዳዊካ ባሬ ኪታንቻቱዎና ገዲዴ፡፡ ዛሬ ኦሌቴዳ፡፡ 8 ሺን ዳዊ ያኔቲና ዳዊያሲኔ ኣ ኪታንቻቱዎሲ ሳሉዎን ሳፃይ ጳዬዳ፡፡ 9 ዎሊቃማ ዳዊ፡ ፃላሂያ ካፑዎ ዎይ ሴፃና ገያዌ፡ ቤኒ ሸሻይ፡ ኣላሚያ ኡባ ባሌሊያዎ ኦሌቴዳ፤ ኢ ባሬ ኪታንቻቱዎና ኢቲፔ ዲጌ ሳፃው ኦሌቴዳ፡፡

10 ሄዎፔ ጉዪያን፡ ታኒ ሳሉዎፔ ሃዎዳን ያገያ ኮሻ ሲሳዲ፤ «ያሳ ኣቶቴላይ ሃዒ ዩዳ፡፡

ያሳይ ባሬው
ካቴ ገዲያዎዳንካ
ባሬ ዎልቃ ቤሴዳ፤
ኣ ኪሪሰቶሲ ባሬ ማታ ቤሴዳ፡፡
ኣዪሲ ሳፔ፡

ቃማኔ ጋላሲ
ያሳ ሲንሳን ኤቄዳ፡፡
ኑ ኢሻቱዎ ሞቲያዌ
ሳሉዎፔ ዲጌ ኦሌቴዳ፡፡

11 ኑ ኢሻቱ ዶርሳ ሱላኒኔ
ባሬንቱ ቱሙ ማርካቴላን
ዳዊያ ኦሌቴዳ ያኔዲኖ፡፡
ቃሲ ኡንቱንቱ
ባሬንቱ ሸምፑዎ ኣሊ ኢሚያዎ
ቃሬቲቤይኪኖ፡፡

12 ሄዎ ዲራው፡
ሳሉኔ ሳሉዎ ገደን ዴዒያዎንቱ፡
ናሽቲቱ፡፡
ሺን ሳፃዉኔ
ኣባው ኣዬር!

12:4 ዳን 8:10 12:5 ኢሳ 66:7፤ ማዝ 2:9 12:7 ዳን 10:13፣ 21፤
12:1፤ ዳት 9 12:10 ዮብ 1:9-11፤ ዛክ 3:1

አደሲ ጎፔ፣
 ፃላሂያ ካፕ
 ባሬው ጉሳ ዎዲ
 አቴዳዎ ኤሪያ ዲራው፣
 ዎልቃማ ሃንቁዋን
 ዲጌ ሂንቴንቴኮ
 ዎዲዳ»
 ያጌዳ።

13 ቃሲ ዳዊ ባሬና ዲጌ ሳዓ ኦሌዳዎ ቤዔዳዎፔ ጉዩያን፣ ሄ አቴማ ናዓ ዩሌዳ ሚሺራቶ ዩዳርሱዎ ደሜዳ። 14 ሚሺራቶ ሸሻይ ቆሄና ማላ፣ ሄዙ ላይላኔ ባጋ ማዴኔ ኡሻዴ ኢዛ ናጌቴያሳ ባዙዎ ፓላዴ ባና ማላ፣ ላዑ ዎልቃማ ኣርጋንሳ ቄሬ ኢዚው ኢሜቴዳ።

15 ሄዎፔ ጉዩያን፣ ሚሺራቶ ዲዑ ዲዒዴ አፋና ማላ፣ ሸሻይ ሻፋ ሃላ ኪና ሃላ ባሬ ዶናፔ ሚሺራቲ ጌዲዎን ጉሴዳ። 16 ሺን ቢታይ ሚሺራቶ ማዴዳ፤ ቢታይ ባሬ ዶና ዶዩዴ፣ ዳዊያ ዶናፔ ኬሴዳ ሃላ ሚቲ አጌዳ። 17 ዳዊ ሚሺራቲው ዶሪሲ ሃንቁቲዳ፣ ኢዚ ዜሬላ ያሳ ኣዛዙዎ ናጊያ ኡባቴዎኔ ዩሱሲ ቆንጨሴዳ ቱሙ አማኔቴያዎንታ ኦላናው፣ 18 ቢዴ አባ ዶናን ዴዒያ ሻፊያን ኤቄዳ።

13

ታኒ አባፔ ኬሲያ ላዑ ደዓቱዎ ቤዓዲ

1 ሄዎፔ ጉዩያን፣ ኢቲ ደዓይ አባፔ ኬሲሺን፣ ታኒ ቤዓዲ። አው ታሙ ካጨኔ ላፕ ሁጲ ዴዔ፤ አ ታሙ ካጨያ ቦላን ታሙ አከሊሊ ዴዔ። አ ሁጲያንካ ቦሪያ ሱንላይ ፃፌቲ ኡቴዳ። 2 ታኒ ቤዓዲ ደዓይ ማሂያ ማላቴ፤ አ ጌዲ ባባንሳ ጌቴቴያ ኢታ ዲዓ ጌዲያ ማላቴ፤ አ ዶናይ ጋሙዎ ዶና ማላቴ። ዳዊ ባሬ ዎልቃ፣ ባሬ ካወቴላ ኦይዲያኔ ባሬ ዎልቃማ ማታ ሄ ደዓው ኢሜዳ።

3 ሄ ደዓ ሁጲቱዎፔ ኢቱ ሃይቄዳዎ ማላቴያዎ ታኒ ቤዓዲ፤ ሸን ዎዲያ ማይላይ ፓፄዳ። ሳዓ አሳይ ኡባይ ማላሌቲዳ፣ ሄ ዲዓ ጌዲዎ ካሌዳ። 4 ዳዊ ባሬ ማታ ደዓው ኢሜዳ ዲራው፣ አሳይ ኡባይ ዳዌው ጎዩኔዳ። ቃሲ ሄ አሳይ፣ «ደዓ ማላይ ኦኔ? አናና ኦሌታናው ኦኒ ዳንዳዩ?» ያጌዴ፣ ደዓው ጎዩኔዳ።

12:14 ዳን 7:25፤ 12:7 13:1 ዳን 7:3፤ ሳፅ 17:3፣ 7-12 13:2 ዳን 7:4-6

5 ሄ ደዓው ፓላ ዩወዋኔ ቦሪያ ሃሳዪያ ደናይ ኢሜቲዳ።
 ኦይታማኔ ላዑ ኣገናሲ ኦላና ማላ፣ ኣው ማታይ ኢሜቲዳ።
 6 ሄ ደዓይ ያሳ፣ ኣ ሱንላ፣ ኢ ዴዒያሳኔ ሳሉዋን ዴዒያ ኡባቱዋ
 ቦሪያ ደሜዳ። 7 ሄ ደዓይ ያሳ ኣሳቱዋና ኦሌቲዳ፣ ኡንቱንታ
 ያናና ማላ፣ ኣው ማታይ ኢሜቲዳ። ቆሙዋ ኡባ፣ ያራ ኡባ፣ ዲማ
 ዲማ ቢታ ቃላ ኡባኔ ዛሪያ ኡባ ሞዲያ ማታይ ኣው ኢሜቲዳ።
 8 ሳዓይ ሜዴታናፔ ካሴ ሹኬቲዳ ዶርሳ ዴዑዋ ማፃፋን ሱንላይ
 ፃፌቲቤና ኣሳይ፣ ሳዓን ዴዒያዌ ኡባይ፣ ሄ ደዓው ጎዪናና።
 9 ሲሲያ ሃይላይ
 ዴዒያ ኡራይ ሲሶ።
 10 ኣሞዴታና ኣሳይ ዴፆፔ፣
 ኦኒኔ ኦሞዴታናዋ።
 ማሻን ሹኬታና ኣሳይ ዴፆፔ፣
 ኦኒኔ ማሻን ሹኬታናዋ።
 ጌሻቱዋ ዳንዲያይኔ
 ኣማኑ ሃዋን ኤሬታናዋ።

ታኒ ሳዓፔ ኬሲያ ደዓ ቤዓዲ

11 ሄዋፔ ጉዪያን፣ ሃራ ደዓይ ሳዓፔ ኬሲያዋ ታኒ ቤዓዲ።
 ዶርሳ ካጪያ ማላቲያ ላዑ ካጪ ኣው ዴዒ፤ ሺን ሄ ደዓይ
 ዲዋያዲን ሃሳዬዳ። 12 ሄ ደዓይ ኮይሮ ደዓ ዋልቃማ ማታ ኡባ
 ኣ ሲንላን ኦሌዳ። ሳዓይኔ ሳዓን ዴዒያ ኣሳይ ኡባይ ኣ ዋዲያ
 ማይላይ ፓዌዳ ኮይሮ ደዓው ጎዪናና ማላ፣ ሄ ደዓይ ጎዳቲዳ።
 13 ሄ ላዒንላ ደዓይ ዋልቃማ ማላታቱዋ ኦሌዳ፤ ሃራይ ኣቶ ታማ
 ሳሉዋፔ ኣሳ ኡባ ሲንላ ሳዓ ዋላና ጋካናው ማላታቱዋ ኦሌዳ።
 14 ኮይሮ ደዓ ሲንላን ኦላናው፣ ኣው ኢሜቲዳ ማላታቱዋን ሳዓን
 ዴዒያ ኣሳ ኡባ ኢ ባሌሌዳ። ማሻን ማይላቶፔኔ ፓፃ ዴዒያ
 ኮይሮ ደዓ ቦንቾ ሚሲሊያ ገገሳናዲን፣ ሳዓ ኣሳ ኡባው ላዒንላ
 ደዓይ ኦዴዳ። 15 ቃሲ ኮይሮ ደዓ ሚሲሊ ሃሳናዲኒኔ ባሬው
 ጎዪኔና ኡባ ዋላናዲን፣ ላዒንላ ደዓይ ባሬ ሺሞፑዋ ኮይሮ ደዓ
 ሚሲሊያን ሺሞፑዋ ገሊሳናው ኣዛዘቲዳ።
 16 ኣሳይ ኡባይ ዋጋይኔ ቄራይ፣ ማንቁኔ ዲራ፣ ዋማኑኔ ኣይሊ
 ባሬ ኡሺቻ ኩሺያን ዋይ ባሬ ዴሙዋን ማላ ዋላናዲን፣ ሄ ላዒንላ
 ደዓይ ጎዳቲዳ። 17 ሄ ደዓ ሱንላይ ዋይ ኣ ሱንላ ፓይዲ ዴዒያ
 ማላይ ባይና ኣሳይ ኦኒኔ ዛሊዓናዉኔ ሻማናው ዳንዲዬና።

13:5 ዳን 7:8፣ 25፤ 11:36 13:7 ዳን 7:21 13:8 ማዝ 69:28
 13:10 ኤርሞ 15:2፤ 43:11

18 አዲዳ ኤራቴላይ ሃዋን ዴዔ። ኤራይ ዴዔያ ኦኒኔ ሄ ዶዓ ፓይዲዋ ቢሌላ ኤር፤ አዲሲ ጎፔ፣ ሄ ፓይዲ ኢቲ አሳ ሱንላ። አ ፓይዲ ኡሱፑን ያታኔ ኡሱፑን ታማኔ ኡሱፑ።

14

ታኒ ዶርሳኔ 144000 አሳቱዋ ቤዓዲ

1 ሃዋፔ ጉዲያን፣ ታኒ ቤዓዲ። ቤዒቱ፣ ዶርሳይ ዲዮኔ ዴሪያ ቦላ ኤቁዳ። አ ሱንላይኔ አ አቡ ሱንላይ ዴሙዋን ፃፊቱዳ፣ ኢቲ ያታኔ ኦይታማኔ ኦይዲ ሻዓ አሳቱ አናና ኢቲፔ ዴዒኖ። 2 ሳሉዋፔ ኩንሶ ሃላ ጉንላኔ ዳዳ ጉንላ ማላቲያ ዋልቃማ ኮሻ ታኒ ሲሳዲ። ቃሲ ታኒ ሲሴዳ ኮሻይ ዲላ ዲዲያዋንቱ ባሪንቱ ዲላ ዲዲና ሲሴቲያ ኮሻ ማላቲ። 3 ኢቲ ያታኔ ኦይታማኔ ኦይዲ ሻዓ አሳቱ ካወቱላ ኦይዲያ ሲንላን፣ ኦይዲ ፓፃ ዴዒያ ማዴታቱዋ ሲንላኒኔ ጨማቱዋ ሲንላን ኤቁዲኖ። ሳዓፔ ዋዜቱዳ ኡንቱንቱፔ አቲን፣ ሃራይ ኦኒኔ ታማራናው ዳንዳዬና ኦራላ ማዚሙሪያ ዬዴዲኖ። 4 ሃዋንቱ ጌሻ አሳቱዋ ጊዲያ ዲራው፣ ማጫዋንቱና ጋኬቲዴ ባሪና ቱኒሲቤይኪኖ። ዶርሳይ * ቢያሳ ኡባ ኡንቱንቱ ካሊኖ። ኡንቱንቱ ያሳሲኔ ዶርሳሲ ባይራ ጊዳናው፣ ሳዓ አሳ ጊዶፔ ዋዜቱዳዋንታ። 5 ኡንቱንቱ ኡባካ ዋርዶቲ ኤሪኪኖ፤ ኡንቱንቱን ባዲዙ ባዋ።

ታኒ ያሳ ኪታንቻ ቤዓዲ

6 ሳዓን ዴዒያ አሳ ኡባው፣ ዛሪያ ኡባው፣ ቆሙዋ ኡባው፣ ዲማ ዲማ ቢታ ቃላ ኡባወኔ ያራ ኡባው ማዴና ዋንጋላ ሚሺራቹዋ አዋጃናው፣ ቦላ ሳሉዋን ፓሊያ ሃራ ኪታንቻ ታኒ ቤዓዲ። 7 ሄ ኪታንቻይ ባሪ ቃላ ቶቁ ኡዲዳ፣ «ያሳው ያዩቲ፤ አ ቦንቸቱ። አዲሲ ጎፔ፣ ሳዓ አሳ ኢ ፐርዲያ ሳቲ ጋኬዳ። ሳሉዋ፣ ሳዓ፣ አባኔ ሃላ ፑልቱዋ ማዴዳ ያሳው ጎዪኒቱ» ያጌዳ።

8 ሃራ ላዒንሶ ኪታንቻይ፣ «ዋልቃማ ባቢሎና ኩንዳዲ፤ ኢዛ ኩንዳዳ ጋሱኔካ አሳ ዛሪያ ኡባ ኢታ ኦሱዋ ኦሲሲያ ዲራሳ» ያጌዳ፣ ኮይሮ ኪታንቻ ካሌዳ።

9 ሃዜንሶ ኪታንቻይ ባሪ ኮሻ ቶቁ ኡዲዳ፣ ሃዋዳን ያጌዳ፣ ኮይሮ ላዑ ኪታንቻቱዋ ካሌዳ፤ «ዶዓወኔ አ ሚሲሌው ጎዪኒያ ኦኒኔ ቃሲ አ ማላ ባሪ ዴሙዋን ዋይ ባሪ ኩሺያን ዋሊያ ኦኒኔ

14:1 ሂዘ 9:4፤ ሳፀ 7:3 * 14:4 ዶርሳ፣ ዬሱሳው አሚቲዳ ሱንላ። 14:5 ሶፍ 3:13 14:8 አሳ 21:9፤ ኤርሞ 51:8፤ ሳፀ 18:2

ዴፖፔ፡ 10 ያሳይ ባሬ ዎልቃማ ሃንቁዎ ቡርጩኩዎን ኩንጱዳ ሃንቁዎ ዎዩኒያ ኤሳ ኢ ኡሻና። ሄዎ ኦጱዳ ኡባይ ጌሻ ኪታንቻቱዎ ሲንሳኒኔ ደርሳ ሲንሳን፡ ታማኒኔ ኤዲያ ዲኒያን ፓፃ ካዔታና።
 11 ኡንቱንታ ፓፃ ካዲያ ታማ ጩዎይ ሜዲ ሜዲናው ጩዎታና። ደዓዉኔ ሄ ደዓ ሚሲሌው ጎዩኒያ ኦሲኔ ቃሲ ሄ ደዓ ሱንሳ ማላታና ዴዲያ ኦሲኔ ቃማኔ ጋላሲ ሸምፑ ባዎ» ያጌዳ።

12 ያሳው ኣዛዜቲያኔ ዬሱሳው ኣማኔቲያ ጌሻቱ ዳንዳዩያ ዳንዳያይ ሃዎና።

13 ሄዎፔ ጉዩያን ሳሉዎፔ፡ «ሃዎ ፃፋ፤ ሃዎፔ ሲንሳው ጎዳን ሃይቂያዎንቱ ኣንጄቴዳዎንታ» ያጌያ ኮሻ ታኒ ሲሳዲ።

ኣያናይ፡ «ቱማ፤ ኡንቱንቱ ባሬንቱ ዳቡራፔ ሸምፓና፤ ኣዩሲ ጎፔ፡ ኡንቱንቱ ሎፖ ኪታው፡ ያሳይ ሎዑዎን ዛራና» ያጌ።

ታኒ ቆይቻ ዎዲያ ቤዓዲ

14 ቃሲካ ታኒ ቤዓዲ። ቤዒቱ፡ ቦላ ሻሪ ዴዔ። ሻሪያ ቦላን ኣሳ ናዓ ማላቲያዌ ኡቴዳ፤ ኣ ሁጲያን ዎርቃ ኣኪሊሊ፡ ቃሲ ኣ ኩሺያን ቃራ ባጫይ ዴዔ። 15 ሃራ ኪታንቻይ ጌሻ ጎሊያፔ ኬሲዴ፡ ሻሪያ ቦላን ኡቴዳዎ ባሬ ቃላ ቶቁ ኡዲዴ፡ «ቆይቻ ሳቲ ጋኬዳ ዲራው፡ ኔ ባጫ ዬዳዴ ካላ ቆይጫ፤ ኣዩሲ ጎፔ፡ ሳዓ ካላይ ሜሌዳ» ያጌዳ። 16 ሻሪያ ቦላን ኡቴዳዌ፡ ባሬ ባጫ ሳዓ ዬዲዴ፡ ሳዓ ካላ ጫኬዳ።

17 ቃሲካ ሳሉዎን ዴዲያ ጌሻ ጎሊያፔ ሃራ ኪታንቻይ ኬሴዳ፤ ኣዉካ ኩሳ ባጫይ ዴዔ።

18 ታማው ካፖ ጊዴዳ ሃራ ኪታንቻይ ያርሺያሳፔ ኬሲዴ፡ ኩሳ ባጫይ ዴዲያ ኪታንቻው ባሬ ቃላ ቶቁ ኡዲዴ፡ «ዎዩኒያ ኣይፊ ቴሪዳ ዲራው፡ ኔ ኩሳ ባጫ ዬዳዴ፡ ሳዓን ዴዲያ ዎዩኒያ ቱራፔ ሆንዶዳ ኣይፊያ ቃንፃ!» ያጌዳ። 19 ሄ ኪታንቻይ ባሬ ባጫ ሳዓ ዬዲዴ፡ ሳዓን ዴዲያ ዎዩኒያፔ ሆንዶዳ ኣይፊያ ቃንፃዳ፤ ያሳ ዎልቃማ ሃንቁዎ ሄ ዎዩኒያ ጉሚዲያ ኦላን ዬጌዳ።
 20 ካታማፔ ጋፃን ዴዲያ ዎዩኒያ ኣይፊያ ጉሚዲያ ኦላን ዎዩኒያ ኣይፊ ጉሚዲያ፡ ሱሳይ ኬሲዴ፡ ሄ ዎዩኒያ ጉሚዲያ ኦላፔ ሄዙ ፃቱ ኪሎ ሚቲሪያ ኬና ሃኪዴ፡ ፓራው ፑሉዎ ጋኪያዎ ኬና ቶቁ ጊዴ ኤሌዳ።

14:10 ኢሳ 51:17፤ ዶሞ 19:24፤ ሃዝ 38:22 14:11 ኢሳ 34:10 14:14 ዳን 7:13 14:15 ኢዩ 3:13 14:20 ኢሳ 63:3፤ ሴል 1:15፤ ሳፅ 19:15

15

ታኒ ቡርጨኩዋ አባ ቤዓዲ

1 ታኒ ሳሉዋን ሃራ ዋልቃማኔ ማላሊሲያ ማላ ቤዓዲ። ያሳ ሃንቁ ኡንቱንቱ ቦላን ፖሌቲያ ዲራው። ወርሴላ ላፑ ቦሻና ዴዒያ ላፑ ኪታንቻቱ ዴዒኖ።

2 ቃሲካ ታኒ ቡርጨኩዋ አባ ማላቲያዋ ታማና ዋላኬቲዳዋ ቤዓዲ። ቃሲ ደዓ፣ አ ሚሲሊያኔ አ ሱንላ ፓይዲዋ ያኔዳዋንታ ቤዓዲ። ያሳይ ኡንቱንቱሲ ኢሜዳ ዲላቱዋ ኦይቁዴ፣ ቡርጨኩዋ ማላቲያ አባ ማታን ኡንቱንቱ ኤቁዲኖ። 3 ኡንቱንቱ፣ ያሳ ኦሳንቻ ሙሴ ማዚሙሪያኔ ደርሳ ማዚሙሪያ ሃዋዲን ዬፆዲኖ።
«ጎዳው፣

ኡባፔ ዋልቃማ ያሳው፣
ኔ ኪታይ ገታኔ ማላሊሲያዋ።

አሳ ዛሪያ ኡባ ካቲው፣
ኔ ኦጊ ዲሉዋኔ ቱሙዋ።

4 ጎዳው፣ ኔው ያዬናዌኔ
ኔ ሱንላ ቦንቹናዌ ኦኔ?

አዪሲ ጎፔ፣ ጌሻይ ኔ ፃላላ።
አሳ ዛሪያ ኡባይ ዪዴ፣

ኔ ሲንላን ጎዩናና፤
አዪሲ ጎፔ፣ ኔ ዲሎ ኪታይ

ኡባው ቆንጨዳ»
ያጊዴ ዬፂኖ።

ላፑ ቦሻና ዴዒያ ላፑ ኪታንቻቱዋ

5 ሄዋፔ ጉዬያን፣ ታኒ ሳሉዋን ዴዒያ ጌሻ ጎሊ ደዬቶዋ ሄዌካ ማርካቴላ ዲንካኒያ ቤዓዲ። 6 ላፑ ቦሻና ዴዒያ ላፑ ኪታንቻቱ ጌሻ ጎሊያፔ ኬሴዲኖ። ኡንቱንቱ ጰሊዴ ቦፂያ ላይኑዋ ማዩዋ ማዬዲኖ፤ ባሬንቱ ቲራ ዋርቃ ዲንጨዋን ዩሺ አሊዴ ቃቹዲኖ። 7 ዴዐዋን ዴዒያ ኦይዲ ሜጴታቱዋፔ ኢቱ፣ ሜጴ ሜጴናው ጋካናው ዴዒያ ያሳ ሃንቁ ኩሜዳ ላፑ ዋርቃ ኬሬቱዋ ላፑ ኪታንቻቶ ኢሜዳ። 8 ያሳ ቦንቹዋፔኔ አ ዋልቃፔ ቡዳ ጨዋይ ጌሻ ጎሊያ ኩሜዳ። ላፑ ኪታንቻቱ አሄዳ ላፑ ቦሻቱ ፖሌታና ጋካናው፣ ጌሻ ጎሊያ ኦኒኔ ጌላናው ዲንዳዪቤና።

15:3 ኬስ 15:1 15:4 ኤርሞ 10:7፤ ማዝ 86:9 15:5 ኬስ 38:21
15:8 ኬስ 40:34፤ 1ካት 8:10-11፤ 2ኦድ 5:13-14፤ ኢሳ 6:4

16

ፆሳ ሃንቁ ኩሜዳ ኬሪቱዋ

1 ሄዋፔ ጉዲያን፣ ላፑ ኪታንቻቶ፣ «ቢዳ ፆሳ ሃንቁዋ ላፑ ኬሪያፔ ሳሳን ጉሲቱ» ያጌዴ፣ ጌሻ ጎሊያፔ ሃሳዱያ ዋልቃማ ኮሻ ታኒ ሲሳዲ።

2 ኮይሮ ኪታንቻይ ቢዴ፣ ባሬ ኬሪያን ዴዲያዋ ሳሳን ጉሲና፣ ደዓ ማላይ ዴዲያዋንቱ ቦላኔ ሄ ደዓ ሚሲሌው ጎዪኒያዋንቱ ቦላ ሎይሴ ሳኪያ ማይላ ኬሴዳ።

3 ላዔንሎ ኪታንቻይ ባሬ ኬሪያን ዴዲያዋ ኣባን ጉሲና ኣባ ሃላይ ሃይቄዳ ኣሳ ሱላ ማላቴዳ። ቃሲ ኣባን ዴዲያ ሜዴታ ኡባይካ ሃይቄ ኣጌዳ።

4 ሄዜንሎ ኪታንቻይ ባሬ ኬሪያን ዴዲያዋ ሻፋቱዋኒኔ ፑልታቱዋን ጉሲና ኡንቱንቱ ሱላ ጊዴዲኖ። 5 ሃላው ኣዋቲያ ኪታንቻይ ሃዋዳን ያጌያዋ፣ ታኒ ሲሳዲ፤

«ካሴካ ሃዒካ ዴዲያ ጎዳው፣ ጌሻው፣

ሃ ፐርዳ ፐርዳዳ ዲራው፣

ኔኒ ዒሉዋ።

6 ኡንቱንቱ ጌሻቱዋ ሱላኔ ናባቱዋ ሱላ

ጉሴዳ ዲራው፣

ኔኒ ኡንቱንታ ኡሻናው

ሱላ ኡንቱንቶ ኢማዳ።

ኡንቱንቱ ባሬንቶ ሴሲያዋ ኣኬዲኖ»

ያጌዳ።

7 ያርሹዋ ያርሺያሳፔ፣ «ጎዳው፣

ኡባፔ ዋልቃማ ፆሳው፣

ኔ ፐርዳይ ቱሙዋኔ ዒሉዋ!»

ያጌያ ኮሻ ታኒ ሲሳዲ።

8 ኦይዴንሎ ኪታንቻይ ባሬ ኬሪያን ዴዲያዋ ኣዋይፊያ ቦላን ጉሲና ባሬ ታማ ሴላን ኣሳ ጉዳናው፣ ኣዋይፊው ማታይ ኢማቴዳ።

9 ኣሳይ ዋልቃማ ሴላን ጉዳቲዴ ሃ ቦሻቱዋ ቦላን ማታይ ዴዲያ

ፆሳ ሱንፋ ሶሬዳ። ሺን ባሬ ናጋራፔ ሲሚቤናኔ ፆሳ ገታቴፋካ ቦንቺቤና።

10 ኢቼሼንፋ ኪታንቻይ ባሬ ኬሪያን ዴዲያዎ ዶዓ ካዉቲፋ ኦይዲያ ሶላ ጉሲና፣ ሄ ዶዓ ካዉቲፋይ ቋሜዳ። ኣሳይ ባሬ ሴላ ዲራው፣ ባሬ ኢንፃርሳ ሳዔዳ። 11 ቃሲ ኣሳይ ባሬ ሴላ ዲራውኔ ባሬ ማይፋ ዲራው ሳሉዋ ፆሳ ሸቄዳ። ሺን ባሬ ኦሴዳ ናጋራፔ ሲሚቤና።

12 ኡሱፑንፋ ኪታንቻይ ባሬ ኬሪያን ዴዲያዎ ዎጋ ኤፊራዳሳ ጌቴቲያ ሻፋን ጉሲና ኣዋይ ዶሊያ ባጋፔ ያና ካታቴዎሲ ኦጊ ጊጋናዳን፣ ሃፋይ ሜሊዳ። 13 ሄዋፔ ጉዪያን፣ ታኒ ሸቋያ ማላቲያ ሄዙ ቱና ኣያናቱ ዳዋያ ዶናፔ፣ ዱዓ ዶናፔኔ ዎርዱዋ ተምቢቲያ ኦዲያዎ ዶናፔ ኬሲሺን ቤዓዳ። 14 ኡንቲንቲ ማላቲዋ ኦሴያ ፃላሃቲዋ ኣያናቲዋ። ሄ ሄዙ ኢታ ኣያናቲ ኡባፔ ዎልቃማ ፆሳ ዎልቃማ ጋላሳን፣ ሳዓ ካታቴዎ ኡባ ኦላው ሸሻናው ባና።

15 «ቤዓ፣ ታኒ ካዪሱዋዳን ያና። ኣሳ ሲንፋን ካሎ ሃሜቲዴ ዬላቲና ማላ፣ ጌሚዲሼናን ባሬ ማዩዋ ማዪዴ ናጊያ ኡሪይ ኣንጃቴዳዋ!» ያጌዳ።

16 ሄ ኢታ ኣያናቲ ካቴቲዋ ኢብራዪሰዳ ቃላን ኣሪማጌዶና * ጌቴቲያ ሳዓ ሺሺዲና።

17 ላፑንፋ ኪታንቻይ ባሬ ኬሪያን ዴዲያዎ ጫርኩዋን ጉሲና፣ ጌሻ ጎሊያን ዴዲያ ኣራታፔ፣ «ፖሌቲዳ» ያጊያ ዎልቃማ ኮሻይ ዬዳ። 18 ሄዋፔ ጉዪያን፣ ዎልቃንፋይ ዎልቃሜዳ፤ ጉንፋይ ሲሴቲዳ፤ ጉጉንፋይካ ጉሜዳ። ቃሲ ቢታይ ፓላ ቃፋ ቃዳዳ። ኣሳይ ሳዓን ሜዴቶዴፔካ ቢታይ ሄዋ ማላ ቃፋ ቃዲ ኤሬና፤ ሄዋ ኡባፔ ኣዴዳ ቃፋ። 19 ዎሊቃማ ካታማይ ሄዙ ኬሲዴ ዛዔዳ። ቢታ ኡባን ዴዲያ ካታማቲ ቋዬዲና። ፆሳይ ዎልቃማ ባቢሎኖ ቆፒዳ፣ ባሬ ኢታ ሃንቁዋ ዎዪኒያ ኤሳይ ኩሜዳ ቡርጨኩዋፔ ዎዪኒያ ኤሳ ባቢሎኖ ኡሼዳ። 20 ኣባን ዶዴቲዳ ቢታይ ኡባይ ቋዬዳ፤ ዴሪካ ቤቲቤና። 21 ኣሳ ሶላ ኦይታሙ ኪሎ ኬና ዴዲያ ዎልቃማ ሻቻይ ሳሉዋፔ ዎዴዳ። ኣሳይ ሄ ሻቻ ቦሻ ዲራው፣ ፆሳ ሶሬዳ፤ ኣዪሲ ጎፔ፣ ቦሻይ ዳር ዎልቃማ።

16:10 ኬሰ 10:21 16:12 ኣሳ 11:15 * 16:16 ኣሪማጌዶና ሃ ቃላው ኮይርቲ ዴዲያ ኢብራዪሰዳ ሜዴታይ፣ «ሃር-ማጊዶ» ያጊያዎ ጊዲዳ፣ «ሃር-ማጊዶ» ጊያዎ ዴዲያ ቢሌፋይ፣ «ሜጊዶ-ዞዚያ» ያጊያዎ። ሃዋ ጉሳይ ቤኒ ዎዲያን ኣሳይ ጮራ ኣላ ኦሌቲዳ ሳዓ ጉሳ። 16:16 2ካት 23:29፤ ዛክ 12:11 16:19 ኣሳ 51:17 16:21 ኬሰ 9:23፤ ሳፅ 11:19

17

ባቢሎን ቦላ ያና ሙራ

1 ሄዋፔ ጉዩያን፣ ላፑ ከሬቱ ዳዒያ ላፑ ከታንቻቱዋፔ አቱ ታኮ ዩዴ፣ ታና ሃዋዳን ያጌዳ፤ «ሃ ያ፤ ዳር ሻፋቱዋ ጋፃን ዳዒያ ዋሹሚያ፣ ዋልቃማ ካታማታ፣ ዋና ሙራታኔንቶ፣ ታኒ ኔና ቤሳና።
 2 ሳዓን ዳዒያ ካታቱ ኢዚና ዋሹሚዲና፤ ሳዓን ዳዒያ አሳይካ ኢዚ ዋዩኒያ ኤሳ ኡሺ ማሶቲዴ ኢዚና ዋሹሚዳ» ያጌዳ።
 3 ሄ ከታንቻይ ታና አያናን ባዙዋ አፌዳ። ሄዋን ታኒ አቲ ሚሺራቶ ቦሪያ ሱንሳይ ቦላ ኡባን ፃፊቲ ኡቲዳ ዞዎ ደዓ ቶጌዳወኖ ቤዓዲ፤ ሄ ደዓው ላፑ ሁጲያን ታሙ ካጪ ዳዒ። 4 ሄ ሚሺራታ ቱራ ኦቻ ማላቲያ ማዩዋኔ ዞዎ ማዩዋ ማያዲ፤ ኢዛ ቃሲ ዋርቃን፣ ቦንቾ ሹቻኒኔ ኢንቁዋ ጌቲቲያ አልዎ ሹቻን አሌቃዲ። ኢዛ ዋሹሚያ ቱናባይኔ ሼኔዩያባይ ኩሚዳ ዋርቃ ቡርጩኩዋ ባሬ ኩሺያን ኦይቃዲ። 5 ኢዚ ዳሙዋን ፀራ ዩወዋ ቢሌሳይ ዳዒያ ሱንሳይ፣

«ዋሊቃማ ባቢሎኖ፤
 ሳዓን ዳዒያ
 ዋሹሚያዋንቶኔ
 ሳዓን ዳዒያ
 ሼኔዩያባው አቶ»

ያጌያዌ ፃፊቲ ኡቲዳ።

6 ቃሲ ሄ ሚሺራታ ጌሻቱዋ ሱላኔ ዩሱሳው ማርካቲሺን ዋዴዳዋንቱ ሱላ ኡሻዴ ማሶቲዳወኖ ታኒ ቤዓዴ ማላሌታዲ።
 7 ከታንቻይ ታና፣ «ኔኒ አዩሲ ሃዋዳን ማላሌታዲ? ታኒ ኔው ሚሺራቲ ፀራ ዩወዋኔ ኢዛ ቶኬዳ ላፑ ሁጲያን ታሙ ካጪ ዳዒያ ዲዓ ፀራ ዩወዋ ኦዳና። 8 ኔኒ ቤዒዳ ደዓይ ካሴ ዳዒ፤ ሺን ሃዒ ባዋ። ሄ ደዓይ ጨዋ ኦላፔ ኤሌ ኬሲዴ፣ ባሻው ባናዋ። አላሚ ሜዴቶዴፔ ደሚዴ፣ ዴዑዋ ማፃፋን ኡንቱንቱ ሱንሳይ ፃፊቲቤና ሳዓን ዳዒያ አሳይ ደዓ ቤዒዴ ማላሌታና። አዩሲ ጎፔ፣ ኢ ካሴ ዳዒ፤ ሃዒ ባዋ፤ ሺን ሲንሳፔ ያናዋ።
 9 «ሃዌ አዴዳ ኤራቴላኔ አኮካ ኮዩ። ላፑ ሁጲ ሚሺራታ ኡቲያ ላፑ ዳሬቱዋ፤ ሄዋንቱ ቃሲ ላፑ ካታቱዋ። 10 ኡንቱንቱፔ ኢቼሹ

17:2 ኢሳ 23:17፤ ኤርዎ 51:7 17:4 ኤርዎ 51:7 17:8 ዳን 7:7፤ ሳፅ 11:7፤ ማዝ 69:28

ካታቱ ኩንዳዲኖ። ኢቱ ሃዒ ጋካናሲካ ሞዴ፤ ዮኮ ካቲ ዪቤና። ኢ ዪዴ፣ ጉላ ዋዲያ ታካናው ቤሴ። 11 ካሴ ዴዔዳ ደዓይ፣ ሃዒ ባይናዌ፣ ኢ ባሬ ሁጳው ሆሰፑንላ ዲዓ። ኢ ላፑ ደዓቱዋፕ ኢቱዋ፤ ኢ ዳያናው ቤ።

12 «ኔኒ ቤዔዳ ታሙ ካጨቱ ሞዳናው ደሚቤና ታሙ ካቱቱዋ። ሺን ኡንቱንቱ ደዓና ኢቲፕ ኢቲ ሳቱው ካቱቱዋዳን ሞዳናው ኡንቱንቱሲ ማታይ ኢሚታና። 13 ኡንቱንቱሲ ኡባው ኢቲ ቆፋይ ዴዔ፤ ኡንቱንቱ ባሬንቱ ዋልቃኔ ባሬንቱ ማታ ደዓው ኢማና። 14 ኡንቱንቱ ደርሳና ኦሌታና፤ ሺን ደርሳይኔ ደርሳና ዴዔያዋንቱ፣ ኢ ዪጌዳዋንቱኔ ደሬዳዋንቱ፣ ኢ ካሊያ ኢማኔቱዳዋንቱ፣ ሄ ካቱቱዋ ያናና፤ ኢዪሲ ሳፑ፣ ኢ ሳዳቱዋ ሳዳኔ ካቱቱዋ ካቲያ» ያጌዳ።

15 ኪታንቻይ ቃሲካ ታና ሃዋዳን ያጌዳ፤ «ጫራታ ኡቴዳ ሄ ኔኒ ቤዔዳ ሃሳይ ያራቱዋ፣ ጮራ ኣሳ፣ ኣሳ ዛሬቱዋኔ ዲማ ዲማ ቢታ ቃላ። 16 ቃሲ ኔኒ ቤዔዳ ታሙ ካጨኔ ደዓይ ዋሹሜዉኖ ኢዳናዋንታ። ኡንቱንቱ ኢዚው ዴዔያ ኡባባ ኣኪዲጋና። ቃሲ ኢዛ ካሎ ኣሻናኔ ኢዚ ኣሹዋ ሚዲጋና፤ ያቲዴ ኡንቱንቱ ኢዛ ታማን ጉዳና። 17 ኣዪሲ ሳፑ፣ ያሳ ቃላይ ቱማታና ጋካናው፣ ኡንቱንቱ ቆፋይ ኢቱዋ ጊዳናዳን፣ ኡንቱንቱ ባሬንቱ ሞዲያ ዋልቃ ደዓው ኢማናዳኔኔ ያሳይ ቆፕዳዋ ኡንቱንቱ ኦላናዳን፣ ኡንቱንቱ ዋዛናን ያሳይ ኣሙዋ ዋጴዳ።

18 «ሄ ኔኒ ቤዔዳ ሚሺራታ ሳዓ ካቱቱዋ ሞዲያ ዋልቃማ ካታማቶ» ያጌዳ።

18

ባቢሎን ኩንዳላ

1 ሄዋፕ ጉዪያን፣ ዋልቃማ ማታይ ዴዔያ ሃራ ኪታንቻይ ሳሉዋፕ ዋዲሺና፣ ታኒ ቤዓዲ። ሄ ኪታንቻ ቦንቹ ሳዓ ፖዒሴዲ።

2 ሄ ኪታንቻይ ባሬ ኮሻ ጶቁ ኡዲዴ፣
«ኢዛ ኩንዳዲ!

ዋልቃማ ባቢሎና ኩንዳዲ!
ባቢሎና ፃላሃቱ ኣቂያሳ ጊዳዲ፤
ኢታ ኣያናቱ ኡባቱኔ
ኢዳቲያ ኢታ ካፋቱ ኡባቱ
ኢኒ ዴዒና።

17:12 ዳን 7:24 18:2 ኢሳ 13:21፤ 21:9፤ ኤርሞ 50:39፤ 51:8፤ ሳፅ 14:8

3 አዩሲ ጎፔ፥
 አሳ ዛሪያ ኡባ
 ባሬ ማሉዳያ ዎዩኒያ ኤሳ
 ኡሺና

አዚና ዎሹሜዲኖ።
 ቃይካ ሳባ ካታቱ
 አዚና ዎሹሜዲኖ።
 ኢዚ አሻሎ ዎልቃ ጋሱዎን
 ሳባን ዳዒያ
 ዛለባንቻቱ ዲሬቴዲኖ»
 ያጌዲ።

4 ሄዎፔ ጉዩያን፥
 ታኒ ሳሉዎፔ
 ሃዎዳን ያጌያ
 ሃራ ኮሻ ሲሳዲ፤
 «ታ አሳው፥ አፔ ከሲቱ!
 ኢዚ ናጋራ ኢዚና ኮፆፕቴ!
 ኢዚ ሙራ ጊሼቶፕቴ።

5 አዩሲ ጎፔ፥
 ኢዚ ናጋራይ
 ሳሉዎ ጋካናው ደሬቲ ኡቴዲ።
 ፆሳይ ኢዚ ኢታ ባዩዙዎ
 ሃሳዬዲ።

6 ኢዛ አሜዳዎ ከና ዛሪዴ፥
 ኢዚው አሚቱ።
 ኢዛ ኦሌዳዎ

ላዑ ኩሺያ
 ኢዚው ቃንዒቱ።
 ኢዛ ሂንቴንቱሲ ጊጊሴዳ ኡሻፕ
 ላዑ ኩሺያ ኡሻ
 ኢዚ ቡርጩኩዎ ኩንላቴ።

7 ኢዛ ቦንቼቴዳዎኔ
 አሻሌዳዎ ከና
 ኢዞ ቱጋዩቴኔ ካዮዩቴ።
 ኢዛ ባሬ ዎዛናን፥
 ታኒ ካታቲዳን ኡታይ፤

18:3 አሳ 23:17፤ ኤርሞ 51:7
 18:6 ማዝ 137:8፤ ኤርሞ 50:29

18:5 ደሞ 18:20-21፤ ኤርሞ 51:9

ታኒ አሲናይ ባይና ማጫወኖ ጊዲኬ፤

ቃሲ ኡባካ ካዮቲኬ፤

ያጋው።

8 ሄዋ ዲራው፤

ኢዚ ቦሻ ኡባይ

ሃርጊ፤ ካዩኔ ኮሻይ

ኢዞ ኢቲ ጋላሲ ኦይቃና።

ቃሲ ኢዛ ታማን ጉዴታና፤

አዪሲ ጎፔ፤

ኢዚ ቦላ ፒርዲያ

ጎዳ ያሳይ ዋልቃማ»

ያጌዳ።

9 ሳባ ካታቱ፤ ኢዚና ዋሹሚዴ አሻሌዳዋንቱ ሄ ካታማታ ጉዴታና፤ ኬሲያ ጩዋ ቤዔዳ ዋዴ፤ ካታማቲው ኡንቱንቱ ዋሳናኔ ዩካና። 10 ኡንቱንቱ ሄ ካታማቲ ኡጋው ያዩዳ ዲራው፤ ሃኪ ኤቂዴ፤ «ሃ ዋልቃማ ካታማቱ! ዋልቃማ ካታማቱ! ባቢሎኔ፤ ኔው አዩር! ኔኒ አይ ማላ ቱጋታኒሻ። ኔኒ ኢቲ ሳቲያ ጊደን ኔ ፒርዳ አካዳ» ያጋና።

11 ኡንቱንቱ ማርካቢያ ጫና ሃዋፔ ሲንፋናው ሻሚያባይ ባይና ዲራው፤ ሳባን ዴዒያ ዛሊባንቻቱ ሄ ካታማቲው ዋሳናኔ ካዮታና።

12 ኡንቱንቱ ዋርቃ፤ ቢራ፤ ቦንቾ ሹቻ፤ ኢንቁዋ ጌቲቲያ አልዎ ሹቻ፤ ቲራ ኦቻ ማላቲያ ማዩዋ፤ ሱፊያ ማላ ማዩዋ፤ ሃሪያ ጌቲቲያ ማዩዋ፤ ዞዎ ማዩዋ፤ ኡባ ቆሞ ሳዊያ ሚላ፤ ኡባ ቆሙዋን ኦሌዳ ዳንጋርሳ አቻ፤ አልዎ ሚላፔ ሜዴቲዳባ፤ ናሃሲያ፤ ቢራታ፤ ኢቢኔቤሬዲያ ጌቲቲያ ሹቻ፤ 13 ቃራፋ፤ ቂማሚያ፤ ኢፃና፤ ሽቲዋ፤ ሳዊያ ኢፃና ጲሊያ፤ ዋዪኒያ ኤሳ፤ ዋጋራ ዛይቲያ፤ ሊቁዳ ጲሊያ፤ ዛርጋ፤ ሚዛ፤ ዶርሳ፤ ፓራኔ ፓራይ ጎቼያ ጋሪያ፤ ኡንቱንቱ አይሌቱዋኔ ሃራይ አቶ አሳ ሽምፑኔ ሻሚያባይካ ባዋ።

14 ዛሊባንቻቱ ሚሽራቲው፤

«ኔኒ አሞቲዳ

ሎዎባይ ኡባይ ኔፔ ሃሊዲጌዳ።

ኔ ዴዐኔ

አሌቁቲያባይ ኡባይ ጳዩዲጌዳ።

ኔኒ ሳዔንሶ

ኡንቱንታ ኡባካ ዴማካ»

18:7 ኢሳ 47:7-9 18:9 ሃዝ 26:16-17 18:11 ሃዝ 27:31፣ 36
18:12 ሃዝ 27:12፣ 13፣ 22

ያጌዲኖ።

15 ሄ ካታማቲን ዛሊዲዳ ዲሬቴዳ ዛሊዲንቻቱ ኢዚ ኡጋው ያዩዳ፣ ኢፔ ሃኪዳ ኤቃና። ኡንቱንቱ ዩካናኔ ካዮታና። 16 ቃሲ፣ «ሱፊያ ጌቲቲያ

ከሪያን ዳዴቴዳ ማዩዋ፣
ቴራ ኦቻ ማላቲያ
ማዩዋኔ ዘያ ማዩዋ ማያዳ፣

ዋርቃ አሌቁዋን፣
ቦንቾ ሹቻኒኔ

አንቁዋ ጌቲቲያ
አልዎ ሹቻን አሌቁዳ፣
ሄ ዋልቃማ ካታማቲው አዬር! 17 ሃዋ ከና

ዋልቃማ ማፀ ኡባይ
ኢቲ ሳቲያ ጊዶን
ዲፒ ጊ ጳዩ አጌዳ»

ያጌዲኖ።

ማርካቢያ ላጊያ ኡባቱ፣ ማርካቢያን ቢያ ኡባቱ፣ ማርካቢያን ኦሊያ ኡባቱኔ አባን ኦሊ ጎዔቲያ ኡባቱ ሃኪ ኤቁዲኖ። 18 ሄ ካታማታ ጉዳቲና ከሲያ ጨዋ ቤዔዳ ዋዴ ባሬንቱ ኮሻ ቶቁ ኡዲዳ፣ «ሃ ዋልቃማ ካታማቶ ማላቲያ ካታማይ ኡባካ ባዋ» ያጌዲኖ።

19 ኡንቱንቱ ባሬንቱ ሁጲያን ባና ቆሊዳ፣ ዋሴዲኖኔ ካዮቴዲኖ፤

«አባን ማርካቤቱ ዳዲያ ኡባ
ባሬ ማፀዋን ዲሬዬዳ
ዋልቃማ ካታማቲው አዬር!
ቃሲ ኢዚው ዳዲያባይ ኡባይ
ኢቲ ሳቲያ ጊዶን
ጳዩ አጌዳ።

20 ሄ ካታማታ ጳዩዳ ዲራው፣
ሳሎ፣ ናሹታ!

ጌሻቶ፣ ዩሱሲ ከቴዳዋንቶ፣
ናባቶ፣ ናሹቲቲ!
አዩሲ ጎፔ፣
ኢዛ ሂንቲንታ ኦሌዳዋ
ዲራው ያሳይ ኢዘ ፒርዳዳ» ያጌዳ።

18:15 ሂዝ 27:31፣ 36 18:17 ኢሳ 23:14፤ ሂዝ 27:26-30 18:18 ሂዝ 27:32 18:19 ሂዝ 27:30-34 18:20 ዛር 32:43፤ ኤርሞ 51:48

21 ሄዋፔ ጉዲያን፡
 ዋልቃማ ኪታንቻይ
 ዋፃ ማላቲያ ዋልቃማ ሹቻ
 ዴንሴ ኣባን ኦሊዴ ሃዋዲን ያጌዳ፤
 «ዋልቃማ ካታማታ
 ባቢሎና ሱጊና፡
 ሃዋዲን ኩንዳና፤
 ኢዛ ሃቼፔ ሲንፋው
 ኡባካ ቤቱኩ።

22 ዲላ ዲዲያዋንቱኔ
 ማዚሙሪያ ዩዲያዋንቱ፡
 ሱሱሊያኔ ማላካታ ፑኒያዋንቱ
 ኮሻይ ሃዋፔ ሂኒ ባጋን
 ኔ ጊዶን ኡባካ ሲሴቴና።
 ኩሺያ ሂላ ኤሪያ ኦኒኔ
 ላዔል ኡባካ ዴዔና።

ዋፃ ኮሻይካ
 ሃዋፔ ሲንፋው ኔ ጊዶን ሲሴቴና።

23 ጾምፒያ ፖዑካ
 ላዔል-ዋ ኔ ጊዶን ፖዔና።
 ኦኪያዋ ኮሻይኔ

ጌሌዉኒ ኮሻይ
 ሲንፋው ኔ ጊዶን ሲሴቴና።

ኔ ዛሊዳንቻቱ ሳዓ
 ኡባን ኤሬቴዳ ዋልቃማቱዋ።

ኔ ቢቲያዋን ኣሳ ዛሪያ ኡባይ
 ጨማቴዳ።

24 ናባቱዋ ሱላይ፡
 ጌሻቱዋ ሱላይኔ

ሳዓን ሃይቄዳ ኡባቱዋ ሱላይ
 ኢዚን ቤቴዳ ዲራው፡

ባቢሎና
 ሙሬታዲ»

ያጌዳ።

18:21 ኤርሞ 51:63-64፤ ሂዝ 26:21 18:22 ሂዝ 26:13፤ ኢሳ 24:8

18:22 ኤርሞ 7:34፤ 25:10 18:24 ኤርሞ 51:49

19

1 ሄዋፔ ጉዩያን፡ ሳሉዋን ጮራ አሳ ኮሻዳን ኮሹሚያ ዋልቃማ ኮሻይ ሃዋዳን ያጊያዋ ታኒ ሲሳዲ፤

«ዖሳ ጋላታይ ጋኮ፡፡

አቶቴሳይ፡

ቦንቹኔ ዋልቃይ

ኑ ዖሳሳ፡፡

2 አ ፒርዳይ

ቱሙዋኔ ያሉዋ፡፡

ጮራታዴ ሳዓ ቱኒሴዳ

ዋልቃማ ጮራቶ

ዖሳይ ፒርዴዳ፤

ዖሳ አሳንቻቱዋ

ኢዛ ዋጴዳ ዲራው፡፡

ዖሳይ ኢዛ ሙሬዳ»

ያጌዳ፡፡

3 አሳይ ላዒንሉዋ ባሬ ኮሻ ጶቁ ኡዲዴ፡፡

«ዖሳ ጋላታይ ጋኮ፡፡

ሄ ካታማታ ሜጲ ሜጲናው ጨዋታና»

ያጌዲኖ፡፡

4 ላታማኔ አይዱ ጨማቱኔ ሸምፑዋና ዴዒያ አይዱ ሜጴታቱ ካዉቴላ አይዲያን ኡቴዳ ዖሳው ጉፋኒዴ፡ «አሜንዒ፡፡ ዖሳ ጋላታይ ጋኮ» ያጊዴ ሳዩኔዲኖ፡፡

ደርሳ ቡላቻው ያሲያ ያሳ

5 ሄዋፔ ጉዩያን፡

«ዖሳ አይላቱ ኡባይ፡

ዖሳው ያዩያ ጉላይ፡

ዳሩ ኡባይ ኑ ዖሳ

ጋላቲቱ»

ያጊያ ኮሻይ ካዉቴላ አይዲያፔ ኬሴዳ፡፡

6 ሄዋፔ ጉዩያን፡ ጮራ አሳዳን ኮሹሚያ፡ ዋልቃማ ሻፋዳን ጉሚያ፡ ዋልቃማ ጉጉንፋዳን ጉጉሚያ ኮሻ ታኒ ሲሳዲ፡፡ ሄ ኮሻይ፡፡ «ዖሳ ጋላታይ ጋኮ፡፡

አዩሲ ሳፔ፡፡

ኑ ሳዳይ፡፡

ኡባፔ ዋልቃማ ዖሳይ

ካውቲዳ።

7 ደርሳ ቡላቻ

ጋላሳይ ጋኬዳ ዲራውኔ

ጌሌውናካ ቡላቻው

ባሬና ገገሴዳ ዲራው።

ኩነ ፓሺኮይቲኔ ናሼቶይቲ፤

ቃሲ ደርሳ ቦንቸይቲ።

8 ጌሌውኒው ማያናው

ሱፊያ ጌቲቲያ

ከሪያን ዳዴቲዳ

ጳሊያ ቦላ ማዩ ኢሜቲዳ።

ሱፊያ ጌቲቲያ

ከሪያን ዳዴቲዳ ማዩ

ጌሻቱዋ

ዲሎ ኦሱዋ»

ያገያዋ፣ ታኒ ሲሳዲ።

9 ሄዋፔ ጉዩያን፣ ከታንቻይ ታና፣ « <ደርሳ ቡላቻው

ዪሴቲዳዋንቱ አንጃቲዳዋንታ) ያጋዴ ፃፋ» ያጌዳ። ሄ ከታንቻይ ቃሲካ ታና፣ «ሃዋ ያሳ ቱሙ ቃላ» ያጌዳ።

10 ሄዋፔ ጉዩ ታኒ አው ጎዩናናው አ ጌዲያን ኩንዳዲ። ሺን ኢ ታና፣ «ሄዋ ኦሳፓ። ታኒ ኔ ማላኔ ዩሱሲ ኡንቱንቱሲ ቆንጨሴዳ ቱማቴላ ኦይቄዳ ኔ ኢሻቱዋ ኡባ ማላ አይሊያ። ያሳው ጎዩና። አዩሲ ጎፔ፣ ዩሱሲ ቆንጨሴዳ ቱማቴላይ ቲምቢቲያ ኦዲያዋ ዴንጮሊያዋ» ያጌዳ።

ቦላ ፓራ ቶጌዳዋ

11 ያቲና፣ ሳሉ ዶዩቲዳዋ ታኒ ቤዓዲ። ሄዋን ቦላ ፓራይ ዳዔ፤ ሄ ፓራ ቶጌዳዋ አማኔቲያዋኔ ቱማንቻ ገዴ ዪሴቲ። ቶጌዳዋ ዪሎቲላን ፒርዴኔ ባሬ ኦላካ ኦሌቲ። 12 አ አይፊ ታማ ላጩዋ ማላቲ፤ ቃሲ ኢ ባሬ ሁጲያን ዳሮ አከሊሊያ ዋሌዳ። አ ቦላ ፃፊቲ ኡቲዳ ሱንሳይ ዳዔ፤ ሺን ሄ ሱንሳይ አዩንቶኔ አፔ አቲን፣ ኦኒኔ ኤሬና። 13 ኢ ማዩዳ ማዩ ሱላን ሙኪ ኬሴዳዋ። አ ሱንሳይካ ያሳ ቃላ። 14 ሳሉዋ ዋታዳራቲ ቦላ ጌሻ ሱፊያ ጌቲቲያ ከሪያን ዳዴቲዳ ማዩዋ ማዩዴ፣ ቦላ ፓራቱዋ ቶጌዴ፣ አ ጌዲዋ ካሊኖ። 15 አሳ ዜሬላ ኢ ጳዩሲያ ኩሳ ማሻይ አ ደናፔ ኬሴ። ቢራታ ፃምዓን አሳ ኢ ሞዳና። ኡባፔ ዋልቃማ ያሳይ ባሬ ሃንቁዋ

19:6 ሂዝ 1:24፤ ማዝ 93:1፤ 97:1፤ 99:1 19:11 ሂዝ 1:1፤ ማዝ 96:13፤
ኢሳ 11:4 19:12 ዳን 10:6

ዎዲኒያ ኤሳይ ጉሚዒቲያሳን፣ ጉሚዒዲ ቤሳና። 16 እ ማዩዎ ቦላኔ እ ዎዲሪያ ቦላ፣ «ካታቱዎ ካቲያኔ ጎዳቱዎ ጎዳ» ያገያ ሱንሳይ ፃፊቲ ኡቲዳ።

17 ሄዎፔ ጉዩያን፣ ታኒ ኢቲ ኪታንቻይ አዎን ኤቁዳዎ ቤዓዲ። ሄ ኪታንቻይ ሳሉዎን ጶቁዴ ፓሊያ ካፋዎ ኡባቶ ባሬ ኮሻ ጶቁ ኡዲዴ፣ «ሃ ዩቲ። ያሳ ካዉዎሲ ኢቲሳዓ ሺቁቲ። 18 ዩዴ ካታቱዎ አሹዎ፣ ሻላቃቱዎ አሹዎካ ዎታዳራቱዎ አሹዎ ሚቲ፤ ፓራቱዎ አሹዎካ ፓራቱዎ ቶጌዳዎንቲ አሹዎካ ሚቲ፤ ቃሲ አሳ ኡባ አሹዎ አይሊያዎኔ ዎማኑዎ፣ ጶቃዎኔ ሆካዎ ሚቲ» ያጌዳ።

19 ፓራ ቶጌዳዎናኔ እ ዎታዳራቱዎና ኦሌታናው፣ ደዓይኔ ሳዓ ካታቱ ቃሲ ኡንቲንቲ ዎታዳራቱ ኢቲ ሳዓ ሺቁ ኡቲዳዎንታ ታኒ ቤዓዲ። 20 ሄ ደዓይ እ ስንሳን ማላታ ኦሌዳ ዎርዶ ናቢያና ኢቲፔ ኦይቁቲዳ። ደዓ ማላይ ዴዒያዎንታኔ ደዓ ሚሲሌው ጎዩኔዳዎንታ ኢ ባሌሌዳዌ ሄ ኦሊያ ማላታቱዎና። ደዓይኔ ዎርዶዎ ቲምቢቲያ ኡዲያዌ ላዓቱካ ዲኒያን ኤዒያ ታማ አባን ፓፃ ዩጌቲዲና። 21 ኡንቲንቲ ዎታዳራቱ ፓራ ቶጌዳዎ ደናፔ ኬሲያ ማሻን ሃይቁዲና። ካፋቲ ኡባቲ ኡንቲንቲ አሹዎፔ ባሬንቶ ዲንዳዬዳዎ ኬና ሜዲና።

20

ሻዓ ላይላ ካዉቲላ

1 ጨዎ ኦላ ቁልፒያኔ ዎልቃማ ሳንላላታ ባሬ ኩሺያን ኦይቁዳ ኢቲ ኪታንቻይ ሳሉዎፔ ዩያዎ ታኒ ቤዓዲ። 2 ኪታንቻይ ዳዎያ፣ ሄ ቤኒ ሾሻ፣ ፃላሂያ ካቸዎ ዎይ ሴፃና ገያዎ ኦይቁዳ፤ ያቲዴ ሻዓ ላይላው ቃቹዳ። 3 ኪታንቻይ ጨዎ ኦላን እ ዩጊዴ፣ ሻዓ ላይላይ ዉራናው፣ አሳ ዜሬላ ላዔሉዎ ባሌቲና ማላ፣ ሄ ጨዎ ኦላ ቁልፒ ጎርዲዴ አታሜዳ። ሄዎፔ ጉዩያን፣ ዳዊ አማሬዳ ዎዲያ ቢሌታናው ቤሴ።

4 ሄዎፔ ጉዩያን፣ ታኒ አራታቱዎኔ ኡንቲንቲን ኡቲዳዎንታ ቤዓዲ፤ ኡንቲንቲሲ ፒርዲያ ማታይ ኢሜቲዳ። ዩሱሲ ቆንጨሴዳ ቱማኔ ያሳ ቃላ አዎጁዳ ዲራው፣ ባሬንቲ ቆዲያ ቃንፃቲዳ አሳ ሺምቸዎካ ታኒ ቤዓዲ። ኡንቲንቲ ደዓው ዎይ ደዓ ሚሲሌው ጎዩኒቤይኪና። ኡንቲንቲ ደዓ ማላ ባሬንቲ ዴሙዎን ዎይ ባሬንቲ ኩሺያን ዎላቤይኪና። ኡንቲንቲ ሃይቁዎፔ ዴንዲዳ።

19:15 ማዝ 2:9፤ ኢሳ 63:3፤ ኢዩ 3:13፤ ሳፅ 14:20 19:17 ሂዝ 39:17-20
20:2 ደዎ 3:1

ከሪስቶስና ኢቲፔ ካቴቱዋዳን ሻዓ ላይላው ሞዴዲኖ።
 5 ሃይቁዳዋንቱ፣ ጮራቱ ሻዓ ላይላይ ወራና ጋካናው፣ ሃይቁዋ፣
 ዴንዲቤይኪኖ። ሄዌ ኮይሮ ዴንዲዋ። 6 ኮይሮ ዴንዲዋን
 ዴንዲዋንቱ ኣንጄቴዳዋንታኔ ያሳ ኣሳቱዋ። ኡንቱንቱ ቦላ
 ላዔንሶ ሃይቆ ዋልቃይ ባዋ። ኡንቱንቱ ያሳሲኔ ከሪስቶስሲ
 ቁሳቱዋ ጊዳና፤ ኡንቱንቱ ኣናና ኢቲፔ ሻዓ ላይላው ሞዴኖ።

ሴፃናይ ያኔቴዳ

7 ሻዓ ላይላይ ወራዳዋ፣ ጉዩያን፣ ሴፃናይ ቃሹዋ፣ ቢሌታና።
 8 ኢ ሳባን ኡባሳን ዴዒያ ኣሳ ዜሬላ ባሌላናው ኬሳና፤ ሄዌ ጎጋኔ
 ማጎጎ ጌቲቲያዋ። ሴፃናይ ኣባ ሻፊያ ከና ዜሬላ ኦላው ሺሻና።
 9 ሄ ዛሬቱ ቢታ ኡባ ማዩዴ ጌሻቱዋ ሄራኔ ያሳይ ሰቂያ ካታማቶ
 ዩዩ ኣጲ ኤቁዲኖ። ሺን ታማይ ሳሉዋ፣ ዋጲዴ፣ ኡንቱንታ ሜዳ።
 10 ደዓይኔ ዋርዶ ናቢ ዩጌቴዳ ኤዲያ ዲኒያ ታማ ኣባን ፃላሂያ
 ካፑ፣ ኣሳ ዜሬላ ባሌሌዳዎ፣ ዩጌቴዳ፣ ኡንቱንቱ ቃማኔ ጋላሲ
 ሜጲ ሜጲናው ፓፃ ካዔታና።

ወርሴላ ፐርዳ

11 ሄዋ፣ ጉዩያን፣ ታኒ ዋልቃማ ቦላ ኣራታኔ ሄ ኣራታን ኡቴዳዋ
 ቤዓዲ። ሳባይኔ ሳሉ ኣ ሲንሳ፣ ባቃቴዲኖ፤ ላዔንሶ ቤቲቤይኪኖ።
 12 ሃይቁዳዋንቱ፣ ቶቁ ጊያዋንቱኔ ጉላቱ ኣራታ ሲንሳን
 ኤቁዳዋንታ ታኒ ቤዓዲ። ማፃፋቱ ደዩቴዲኖ፤ ሃራ ማፃፋይ፣
 ዴዑዋ ማፃፋይካ ደዩቴዳ። ሃይቁዳዋንቱ ባሬንቱ ኦሱዋዳን፣
 ማፃፋቱዋን ፃፊቲ ኡቴዳዋዳንካ ፐርዴቴዲኖ። 13 ኣባይ ባሬ
 ጊደን ዴዒያ ሃይቁዳዋንታ ኢሜዲ፤ ሃይቁኔ ሲያሊ ባሬንቱ
 ጊደን ዴዒያ ሃይቁዳዋንታ ኢሜዲኖ። ኡባይካ ባሬንቱ ኦሱዋዳን
 ፐርዴቴዲኖ። 14 ሄዋ፣ ጉዩያን፣ ሃይቁኔ ሲያሊ ታማ ኣባን
 ዩጌቴዲኖ። ሄ ታማ ኣባይ ላዔሶ ሃይቁዋ። 15 ዴዑዋ ማፃፋን
 ባሬ ሱንሳይ ፃፊቲቤና ኣሳይ ኦኒኔ ታማ ኣባን ዩጌቴዳ።

21

ኦራላ ሳሉዋኔ ኦራላ ሳባ

1 ሄዋ፣ ጉዩያን፣ ታኒ ኦራላ ሳሉዋኔ ኦራላ ሳባ ቤዓዲ። ኮይሮ
 ሳሉኔ ኮይሮ ሳባይ ቆዩዳ። ኣባይካ ቆዩዳ። 2 ጌሻ ካታማታ ኦራላ

20:4 ዳን 7:9፣ 22 20:8 ሃዝ 7:2፣ 38:2፣ 9፣ 15 20:11 ዳን 7:9-10
 21:1 ኢሳ 65:17፣ 66:22፣ 2ጵፅ 3:13

ዬሩሳላሜ፡ ባሬ አሲናው ማያዴ ገጌዳ ጌሊያ ዎድሮ ናቲዳን፡ ገጋ ኡቲዳውና ሳሉዋፔ ያሳ ማታፔ ዲጌ ዎዴውኖ ታኒ ቤዓዲ።

3 ዎሊቃማ ኮሻይ አራታፔ ሃዋዳን ያገደ፡ ሃሳዪሺን፡ ታኒ ሲሳዲ፤ «ያሳ ጎሊ አሳና ዴዔ፤ ያሳይ አሳና ኢቲፔ ዴዓና። ኡንቱንቱ ኣ አሳ ገዳና፤ ያሳይ ባሬ ሁጹው ኡንቱንቱና ዴዓና። ኢ ኡንቱንቱ ያሳ ገዳና። 4 ያሳይ ኡንቱንቱ ኣይፊያ ኣፉላ ኡባ ቁጫና። ሃዋፔ ሲንላናው ሃይቁኔ ካዩ ዎይ ዋሱኔ ሳኩ ባዎ። ኣዪሲ ጎፔ፡ ኤጫባይ ዳዩዳ» ያጌዳ።

5 አራታን ኡቲዳዌ፡ «ታኒ ኡባባ ኦራዒሳይ» ያጌዳ። ቃሲካ ጉጂዴ ታና፡ «ታኒ ሃሳዪያዌ አማኔቲያዎኔ ቱማ ገዲያ ዲራው ያፋ» ያጌዳ። 6 ቃሲካ ታና ሃዋዳን ያጌዳ፤ «ፖሌቲዳ። ታኒ ኣልፋኔ ኦሚጋ፤ ዶሜላኔ ፖሉዋ። ሳሜቲዳ ኦናኔ ታኒ ዴዐዋ ሃላ ፑልቱዋፔ ጮ ኡሻና። 7 ያኒያ ኡራይ ኦኒኔ ሃዋ ኡባ ላታና። ታኒ ኣው ያሳ ገዳና፤ ኢካ ታ ናዓ ገዳና። 8 ሺን ያዪያዎንቱ፡ አማኔናዎንቱ፡ ቱናቱ፡ ሺምፑዋ ዎዴያዎንቱ፡ ዎሹሚያዎንቱ፡ ቢቲያዎንቱ፡ ኤቃሲ ጎዪኒያዎንቱኔ ዎርዶቲያዎንቱ ኡባይ ዴዒያ ሳዒይ ታማይኔ ኤዒያ ዲኒ ኤዒያ ኣባ ገዳናዎ። ሄዌ ላዔንላ ሃይቁዋ» ያጌዳ።

ኦራላ ዬሩሳላሞ

9 ላፑ ወርሴላ ቦሻቱ ኩሜዳ ላፑ ከሬቲዋ ኦይቁዳ ላፑ ከታንቻቱዋፔ ኢቱ ታኩ ዪዴ ታና፡ «ሃ ያ። ታኒ ኔና ጌሌውኖ ዶርሳ ማቻቶ ቤሳና» ያጌዳ። 10 ከታንቻይ ታና ዳሮ ቶቃ ዴሪያ ሁጹያ ኣያናን ከሲዴ ጌሻ ካታማታ፡ ዬሩሳላማ ሳሉዋፔ ያሳ ማታፔ ዲጌ ዎዴውኖ ታና ቤሴዳ። 11 ሄ ካታማታ ያሳ ቦንቱዋን ፖዓው። ሄ ካታማቲ ፖው ያሰጲዲያ ጌቲቲያ ኣልያ ሹቻ ማላ፤ ቦሪሊያዳን ጸላው። 12 ሄ ካታማቲው ታማኔ ላዑ ፔንጌቲኔ ሄ ፔንጌቲዋን ታማኔ ላዑ ከታንቻቱ ናገያ ዎልቃማ ኣዲሳ ዲርሳይ ዴዔ። ፔንጌቲዋን ታማኔ ላዑ ኢስራዔሊያ ዛሬቲዋ ሱንላይ ያፌቲ ኡቲዳ። 13 ኣዋይ ዶሊያ ባጋና ሄዙ ፔንጌቲ ዴዒኖ። ቃሲ ሂርኪ ባጋና ሄዙ ፔንጌቲኔ ሁጹሳ ባጋና ሄዙ ፔንጌቲ ዴዒኖ። ኣዋይ ወሊያ ባጋናካ ሄዙ ፔንጌቲ ዴዒኖ። 14 ካታማቲ ዲርሳይ ዶርሳይ ከቲዳ ታማኔ ላዒቲዋ ሱንላይ ያፌቲዳ ታማኔ ላዑ ሹቻቱዋ ቦላ ገምቤቲዳ።

21:2 ኢሳ 52:1፤ 61:10፤ ሳሳ 3:12 21:3 ሂዝ 37:27፤ ዎግ 26:11፤ 12
21:4 ኢሳ 25:8፤ 35:10፤ 65:19 21:7 2ሳም 7:14፤ ማዝ 89:26-27
21:10 ሂዝ 40:2 21:12 ሂዝ 48:30-35

15 ታናና ሃሳዬዳ ኪታጎቻው ካታማቶ፡ ኢዚ ፔንጌቱዋኔ ኢዚ ዲርሳ ሊኪያ ዋርቃ ጋቲማይ ዳዔ። 16 ካታማቲው ኦይዲ ጋፃይ ዳዔ፤ ካታማቲ ጌሳይኔ ጎምፓይ ኢቲ ማላ። ኪታጎቻይ ካታማቶ ባሬ ጋቲማን ሊኪዳ። ካታማታ ላዑ ሻዓኔ ላዑ ፃቱ ኪሎ ሚቲሪያ ጌዳዲ፤ ካታማቲ ጌሳይ፡ ጎምፓይኔ ዶቃቲሳይ ኢቲ ማላ። 17 ኪታጎቻይ ቃሲ ዲርሳካ ሊኪዳ። ኣሳ ኩሺያን ኢቲ ፃታኔ ኦይታማኔ ኦይዲ ዋቆ ጌዳዳ። ሄዌ ኦኒኔ ሊኪያ ኦጊያን ኪታጎቻይ ሊኪናዳ።

18 ካታማቲ ዲርሳይ ያሰጸዲያ ጌቲቲያ ሹቻን ዲሬቲዳ። ካታማታ ቢሪሊያዳን ጸሊያ ጌሻ ዋርቃን ሜዴታዲ። 19 ካታማቲ ዲርሳው ሃፃቲዳ ሹቻይ ቦንቹቲዳ ሹቻ ኡባን ኣሌቄቲዳ፤ ኮይር ሃፃቲዳ ሹቻይ ያሰጸዲያ፤ ላዒንሉ ሳምፔሪያ፤ ሄዘንሉ ኬልቄደኒያ፤ ኦይደንሉ ባሉሪያ፤ 20 ኢቹሽንሉ ሳርደንኪሳ፤ ኡሱፑንሉ ሳርዲዮና፤ ላፑንሉ ኪሪሰቲሎባ፤ ሆሰፑንሉ ቢራሊ፤ ኡዲፑንሉ ቶጸዚዮኒያ፤ ታሙንሉ ኪሪሰጸራሲሳ፤ ታማኔ ኢቲንሉ ያኪንቲያ፤ ታማኔ ላዒንሉ ኣሚቲሰፂናሲያ።

21 ታማኔ ላዑ ፔንጌቱ ታማኔ ላዑ ኢንቁዋ ጌቲቲያ ኣልፃ ሹቻ፤ ኢቲ ኢቲ ፔንጌ ኢቲ ኢንቁዋን ኦሴቲዳ። ካታማቲ ኦጊ ቢሪሊያ ማላ ጌሻ ዋርቃ።

22 ጎዳይ፡ ኡባፔ ዋልቃማ ያሳይኔ ደርሳይ ካታማቲ ጌሻ ጎሊያ ጌዲያ ዲራው፡ ታኒ ሄ ካታማቲን ጌሻ ጎሊያ ቤዓቤይኬ።

23 ካታማቲው ፖዒያ ኣዋይ ዋይ ኣኔናይ ኮሺና። ኣዪሲ ጎፔ፡ ያሳ ቦንቹ ሄ ካታማቲን ፖዒ፤ ደርሳይካ ሄ ካታማቲው ያምፒያ።

24 ኣሳ ዜሬላይ ካታማቲ ፖውዋን ሃሚታና። ሳሳ ካታቲካ ባሬንቲ ቦንቹዋ ሄ ካታማቲኮ ኣሃና። 25 ካታማቲ ፔንጌቱ ኡባ ጋላሲካ ደያ ዳዓና፤ ኡባካ ጎርዴቲኪና። ኣዪሲ ጎፔ፡ ሄዋን ቃማይ ባዋ።

26 ኣሳ ዜሬላ ጌታቲሳይኔ ቦንቹ ሄ ካታማቲኮ ሺቃና። 27 ሺን ቱናባይ ዋይ ካዉሻባ ኦሊያዌ፡ ዋይ ዋርዶቲያዌ ኦኒኔ ሄ ካታማቶ ጌሌና። ቃሲ ደርሳ ዳዑዋ ማፃፋን ሱንሳይ ፃፊቲዳዋንቲ ፃላላይ ሄ ካታማቶ ጌላና።

22

1 ሄዋፔ ጉዪያን፡ ኪታጎቻይ ታና ያሳ ካዉቲላ ኦይዲያፔኔ ደርሳ ካዉቲላ ኦይዲያፔ ጎጊያ ቢሪሊያዳን ጸሊያ ዳዑዋ ሃላ

21:15 ሂዝ 40:3 21:18 ኢሳ 54:11-12 21:23 ኢሳ 60:19-20
 21:24 ኢሳ 60:3 21:27 ኢሳ 52:1፤ ሂዝ 44:9

ሻፋ ቤሴዳ። 2 ሄ ሻፋይ ካታማ ኦጊያ ጊዲዋና ዲጌ ጎጌ። ሻፋፔ ሄፊንፋ ባጋናኔ ሃፊንፋ ባጋና ኣጌናን ኢቲ ጌዴኔ ላይፋን ታማኔ ላዑ ጌዳ ኣይፊያ ዳዑዋ ሚላይ ዳዑ። ሄ ሚላ ቦንቹ ዳዒያዌ፣ ዛሬያ ኡባ ሃርጊያፔ ፓሳናሳ።

3 ሄ ካታማን ያሳ ሺቃይ ኣይኔ ባዋ። ያሳ ካዉቱላ ኦይዲኔ ደርሳ ካዉቱላ ኦይዲ ሄ ካታማን ዳዒና። ያሳ ኦሳንቻቱ ያሳው ጎዪናና። 4 ኡንቱንቱ ኣ ዳሙዋ ቤዒና፤ ኣ ሱንሳይ ኡንቱንቱ ዳሙዋን ፃፊታና። 5 ሄዋፔ ሲንሳው ሃራ ቃማይ ባዋ። ኡንቱንቶ ያምፒያ ዋይ ኣዋ ፖዑዋ ኮሺና፤ ኣዪሲ ጎፔ፣ ጎዳይ ያሳይ ኡንቱንቱሲ ያምፒያ ጊዳናዋ። ኡንቱንቱ ሜጲ ሜጲናው ካዉታና።

ዬሱሳ ዩሳ

6 ሄዋፔ ጉዪያን፣ ኪታንቻይ ታና ሃዋዳን ያጌዳ፤ «ሃ ታኒ ሃሳዪያዌ ቱሙዋኔ ኣማኔቲያዋ። ናባቶ ባሬ ጌሻ ኣያና ኢሚያ ጎዳይ ያሳይ፣ ማታን ሃናናው ቤሲያዋ ባሬ ኦሳንቻቱዋ ቤሳናው ባሬ ኪታንቻ ኪቱዳ» ያጌዳ።

7 ዬሱሲ፣ «ቤዒ! ታኒ ኤሌካ ያና። ሃ ማፃፋን ዳዒያ ቲምቢቲያ ናጊያዋንቱ ኣንጃቲዳዋንታ» ያጌዳ።

8 ታኒ ዮሃኒሲ፣ ሃ ኡባባ ሲሳዲኔ ቤዒዳ። ታኒ ሃዋ ሲሴዳ ዋዴኔ ቤዒዳ ዋዴ፣ ሄዋ ታና ቤሴዳ ኪታንቻው ጎዪናናው፣ ኣ ጌዲያን ኩንዳዲ። 9 ሺን ኪታንቻይ ታና፣ «ሄዋ ኦሳፓ። ታኒ ኔናዲኒኔ ናቤ ጊዳዳ ኔ ኢሻቱዋዳን፣ ቃሲ ማፃፋን ዳዒያባው ኣዛዜቲያ ኡባቱዋዳን ኣይሊያ። ያሳው ጎዪና» ያጌዳ።

10 ሄዋፔ ጉዪያን፣ ኪታንቻይ ታና፣ «ሃናና ጌዳ ሃ ማፃፋ ቃላ ማታፋን ጎርዶፓ። ኣዪሲ ጎፔ፣ ሃ ኡባባይ ፖሌቲያ ዋዲ ማታቱዳ።

11 ኢታባ ኦሊያዌ ጉጂዳካ ኢታባ ኦሳ፤ ቱናይ ጉጂዳካ ቱኖ። ሎዖባ ኦሊያዌ ጉጂዳካ ሎዖባ ኦሳ፤ ጌሻይኔ ጉጂዳካ ጌሻ ጊደ» ያጌዳ።

12 ዬሱሲ፣ «ቤዒ! ታኒ ኤሌካ ያና። ኣሳ ኡባው ኣ ኦሱዋዳን ኢማናው፣ ታ ዋይታ ኣካ ያና። 13 ታኒ ኣልፋኔ ኦሚጋ፤ ኮይሩዋኔ ዉርሴላ፤ ደሜላኔ ፖሎዋ» ያጌዳ።

22:1 ሂዝ 47:1፤ ዛክ 14:8 22:2 ዶም 2:9፤ ሂዝ 47:12 22:3 ዛክ 14:11 22:5 ኢሳ 60:19፤ ዳን 7:18 22:11 ዳን 12:10 22:12 ኢሳ 40:10፤ 62:11፤ ማዝ 28:4፤ ኤርሞ 17:10 22:13 ሳፅ 1:8፣ 17፤ 2:8፤ ኢሳ 44:6፤ 48:12

14 ባሬንቱ ማዩዋ ጌሺ ሜጨያዋንቱ አንጃቲዳዋንታ። ዴዑዋ ሚላ አይፊያ ማናውኔ ካታማ ፔንጊያና ጌላናው ኡንቱንቱሲ ማታይ ኢሜቲዳ። 15 ሺን ካናቱ፣ ቢቲያዋንቱ፣ ዋሹሚያዋንቱ፣ ሼምፑዋ ዋዲያዋንቱ፣ ኤቃሲ ጎዪኒያዋንቱ፣ ባሬንቱ ሃሳያኒኔ ባሬንቱ ኪታን ዋርዶቲያዋንቱ ካሬና ዴዒኖ።

16 «ታኒ ዩሱሲ፣ ሃ ዩወዋ ሂንቲንቱሲ ዋሳ ጎሌቱዋን ማርካታና ማላ፣ ታ ኪታንቻ ኪታዲ። ታኒ ዳዊታ ጎሊያ ዩሌታ። ታኒ ፖዒሲያ ዋንታ ባካሊያ» ያጌዳ።

17 ጌሻ አያናይኔ ጌሌዉና፣ «ሃ ያ» ያጊኖ። ቃሲ ሃዋ ሲሲያዌ ኦኒኔ፣ «ሃ ያ» ያጎ። ሳሜቲዳ አሳይ ኦኒኔ ሃ ዮ። ዴዑዋ ሃላ ኮዪያ አሳይ ኦኒኔ ጮ አኮ።

18 ታኒ ሃ ማፃፋን ፃፌቲዳ ሃናና ጌዳ ቃላ ሲሲያ ኦናኔ ዘራይ። ኦኒኔ ሃ ቃላ ቦላ ኢቲባ ጉጃፔ፣ ያሳይ ሃ ማፃፋን ፃፌቲዳ ቦሻ አ ቦላ ጉጃና። 19 ኦኒኔ ማፃፋን ዴዒያ ቲምቢቲያ ቃላፔ አያኔ ፓጨሶፔ፣ ሃ ማፃፋ ጊዶን ቆንጨሴዳ ዴዑዋ ሚላ አይፊያፔኔ ጌሻ ካታማፔ አ ጋኪያ ጊሹዋ ያሳይ ፓጨሳና።

20 ሃ ኡባባው ማርካቲያዌ፣ «ቱማ! ታኒ ኤሌካ ያና» ያጌ። አሜንዒ። ጎዳ ዩሱሳ፣ ኔኒ ሃያ።

21 ጎዳ ዩሱሲ ኪሪሰቶሳ አዶ ከካቲላይ ሂንቲናና * ኡባና ጊዶ። አሜንዒ።

22:14 ደሞ 2:9፤ 3:22 22:16 ኢሳ 11:1፣ 10 22:17 ኢሳ 55:1
22:19 ዛር 4:2፤ 12:32 * 22:21 ሂንቲናና፣ ጮራ ሃራ ቢሌላቱዋን፣ ያሳ አሳ ኡባና ያጌ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source
files dated 29 Jan 2022
585b63ca-b8e6-55c8-bfef-10bdc95ad69c